

Caso Caret: OM a exige castigo condicional y servicio comunitario pa ambos sospechoso



Pagina 3

- **Minister Arthur Dowers a ricibi presentacion riba exploracion di petroleo**

Pagina 6

- **Gobierno di Corsou ta sigui aproba proyectonan sin financiamiento completo**

Pagina 8

- **Venezuela cu peticion na UN pa liberacion di Maduro**

Pagina 11

Despues di mas cu 10 aña:
gobierno ta modernisa e Beach
Policy di Aruba



Pagina 2

Jetten huramenta como e premier
Hulandes mas jong den historia



Pagina 9



Iran lo reacciona
“ferozmente”
na cualkier
atake di Merca

Pagina 22

Despues di mas cu 10 aña: gobierno ta modernisa e Beach Policy di Aruba

Den un anuncio cu hopi ciudadano a spera pa aña largo, Minister di Infraestructura, hunto cu Minister di Turismo, Transporte y Labor, Wendrick Cicilia (AVP) a confirma oficialmente cu Gobierno di Aruba lo inicia un revision completo y modernisacion di e beach policy di e isla.

E revision ta dirigi na e Richtlijn Ruimtelijke Inrichting Stranden — conoci como e RRIS — e documentacion oficial di gobierno cu desde 2016 ta determina con beachnan publico di Aruba mester ser usa, dividi y protegi. Pa prome biaha den mas cu dies aña, e politica aki lo ricibi un actualisacion integral.

Kico ta e RRIS y con e a traha?

E Richtlijn Ruimtelijke Inrichting Stranden, of RRIS, ta e directiva di politica cu DIP (Directie Infrastructuur en Planning) ta usa pa evalua y aproba solicitud pa uso di beachnan publico na Aruba. E RRIS a keda anuncia oficialmente door di gobierno di Aruba riba 26 di augustus 2014, y a keda implementa na 2016. E documento ta cubri principalmente e districto di Westkust — e zona di costa cu ta core for di Bushiri te Arashi, e trayecto mas popular di Aruba.

E principio fundamental di e RRIS ta cla: “De stranden van Aruba behoren tot het publieke domein en moeten toegankelijk zijn en blijven voor iedereen, bewoner of bezoeker van ons land, op gelijke basis” — esaki ta indica cu beachnan di Aruba ta pertenece na dominio publico y mester keda accesibel pa tur hende di mesun manera, sea residente of bishitante.

E RRIS ta establece un sistema di zona pa e beach — incluyendo un zona di lama di 50 meter (conforme cu e Landsbesluit Openbare Wateren en Stranden) cu segun e ROP 2019 lo mester keda aumenta na 75 meter — hunto cu un bufferzone adicional di 75 meter. Operadornan di watersport y negoshi na beach ta ricibi permisonan di “peligro” — licencianan temporal pa usa tereno publico — suheto na condicion estricto y renobacion anual.

Segun confirmacion huridico den diferente pronunciamiento di corte, e RRIS no ta un ley formal sino un directiva di politica — cual na practica a significa cu e aplicacion di e reglanan tabata depende fuertemente di e voluntad politico di cada ministerio. E resultado: aña tras aña, residentenan a mira inconsistencia den aplicacion, confusion riba fronteranan di propiedad, y operadornan riba beach cu tabata actua sin of cu permiso inadecuado.

Un historia di frustracion: e problemanan cu a forsa e cambio



E anuncio di Minister Cicilia no ta bini den un bashi. Den añanan recien, Bon Dia Aruba a reporta riba un serie di incidente y tension riba beachnan publico di Aruba, cu hunto ta pinta un potret di un sistema di maneho cu a keda atras di e realidad di un isla cu turismo ta crece rapidamente.

E problema di palapa ta entre e mas persistente. Desde 2022 caba Bon Dia Aruba a busca claridad tocante e situacion di palapanan riba beach, y den juli 2024 — na pleno temporada halto — e controversia a bolbe den discurso publico. Turista, via gruponan popular riba Facebook, a reporta cu tabata cobra of intimidaba nan pa usa palapanan riba beach publico, cu algun hotel incluso tabata manda e-mail na huesped avisando cu parasol na beach ta costa entre \$18 y \$40. CEO di AHATA, Tisa LaSorte, a duna claridad indicando cu solamente e pida di beach cu ta den “erfpacht” di e hotel ta priva — pero e confusion a sigui pasobra e fronteranan fisicamente no ta marca cla pa ningun hende.

Na september 2024, un incidente na Baby Beach — unda un ciudadano local a confronta un turista y su famia pa a purba di usa un palapa cu e local a “reserva” — a ilustra con profundo e frustracion por yega. E turista a publica e encuentro riba rednan social, unda el a relata cu e señora local a bis’e cu si e no respeta su espacio, mester bandona e isla. Segun e publicacion, a yama polis dos biaha caba e mainta ey. E incidente a dividi opinion: algun ta compronde e causa di e activista local, pero practicamente tur hende a concorda cu e manera di actua no tabata e corecto.

Y na februari 2026 — practicamente na e mesun momento cu e anuncio di Minister Cicilia — Bon Dia Aruba a reporta riba e tendencia mas amplio di overcrowding turistico cu ta afecta no solamente e beachnan, pero tambe bisindarionan residencial. Areanan di Tres Trapi, Baby Beach y Mangel Halto, cu originalmente tabata ser considera refugio tranquil pa localnan, awo ta inunda door di gruponan di UTV/ATV y tournan di boto.

Ciudadanonan a expresa nan preocupacion riba rednan social, cu comentarionan manera “esey lo mata naturalesa” y “ki dia Aruba lo mira cu nos no por practica turismo riba escala grandi na un isla di escala chikito.”

Kico lo cambia: e modernisacion di e RRIS

Segun e comunicado oficial di gobierno, e proceso di modernisacion di e RRIS lo atende cu varios punto concreto. Ta bay revisa y actualisa e guianan espacial di e directiva actual. Ta bay atende e retonan concreto di uso excesivo y saturacion di beach y ta bay introduci regulacion mas estricto y cla pa asina reduci e ambigüedad cu aña tras di aña a crea confusion y conflicto.

Notablemente, e modernisacion lo incorpora un beach adicional bao di e cobertura di e beach policy, ampliando e proteccion geografico mas leu di e Westkust tradicional. E meta ta un reparticion mas balansa y husto di e espacionan di beach riba henter Aruba.

Minister Cicilia a enfatisa un prin-

cipio cu — segun su opinion — nunca mester a keda den duda: “Ningun beach na Aruba nunca lo ta propiedad di un hotel.” E declaracion ta dirigi claramente na e confusion persistente tocante fronteranan di propiedad y e practica di comercialisacion di espacionan publico. E minister a finalisa bisando: “Beach ta pa tur hende, awe y pa e generacionnan binidero.”

E proceso lo ta interministerial: DIP lo sirbi como e cuerpo tecnico pa sostene e revision, respalda tanto pa Ministerio di Turismo como pa Ministerio di Infraestructura. Aruba Tourism Authority a contribui cu financiamiento parcial pa e proceso, un señal cu e sector turistico mes ta reconoce e necesidad di un maneho mas sostenible di e beachnan. Den e siguiente simannan, gobierno lo inicia un dialogo cu stakeholdernan relevante — hotelero, operador di tour, grupo ambiental, y representantenan di comunidad — pa segura cu e beach policy nobo refleha un perspectiva amplio.

Importancia di e anuncio: un paso necesario, pero pregunta ta keda

Pa hopi ciudadano, e anuncio ta un reconocimiento laat di algo cu ya nan tabata biba. E frustracion cu aña di inconsistencia den aplicacion, falta di claridad tocante frontera, y operadornan cu tabata actua sin permiso adecuado a crea un cierto nivel di desconfianza publico cu no lo desaparece inmediatamente cu un comunicado di prensa. E preguntanan real lo haya contesta — of no — durante e proceso di consulta cu stakeholdernan y, eventualmente, den e texto revisa di e propio RRIS.

Entre e preguntanan cu por anticipa di ciudadano y activista: Ki beach nobo lo ser agrega bao di proteccion? Kico exactamente lo cambia den e sistema di permisonan di precario? Con ta bay aplica e regulacionnan mas estricto en practica? Y con ta bay defini y marca fisicamente e fronteranan entre beach publico y area concesionan pa hotel, di forma cu no ta laga espacio pa confusion?

Pa Aruba, un isla cu su economia ta depende profundamente di turismo pero cu su identidad cultural ta mara intrinsecamente na acceso liber na lama y beach, e balans entre oportunidad economico y derechonan publico ta un di e debatenan mas fundamental di nos momento. E modernisacion di e RRIS por ta un stap importante den e direccion corecto — pero e éxito di e reforma lo ser midifinalmente no door di e anuncio, sino door di e implementacion y aplicacion den practica diario, riba cada beach, pa cada ciudadano.

Caso Caret: Hues a schors e caso pa mas tempo pa delibera

OM a exige castigo condicional y servicio comunitario pa ambos sospechoso

Dia dos di tratamento di caso Caret a concentra principalmente riba e posicion di Ministerio Publico (OM) y defensa den e proceso penal contra e dos polisman involucra den e incidente fatal cu a resulta den morto di e hoben di 19 aña, Ayden Lanoy, dia 9 di februari 2025. Durante e audiencia, OM a pone enfasis riba un principio fundamental: niun hende ta riba ley. Den cada situacion unda polis ta involucra den un incidente fatal, e proceso mester sigui su curso di forma husto y transparente.

E pregunta central cu corte mester contesta ta si e polisnan ta culpabel pa loke a suceder.

Segun OM, den un situacion di peliger por spera cu polis ta actua activamente pa controla y soluciona e situacion. Sinembargo, uso di arma di candela ta solamente permiti den situacion di peliger extremo. Fiscal a splica e cuadro legal cu ta aplica na polis y con nan mester comporta ora nan ta ehecuta nan trabao.

Un principio importante ta cu semper mester busca alternativa prome cu usa violencia pa trece seguridad. Polis tin autoridad pa usa violencia, pero e autoridad ey ta bin cu responsabilidad y obligacion pa evalua e riesgo. Nan mester determina si tin obstaculo real pa logra nan obhetivo y si tin otro alternativa disponible, nan mester usa esaki.

Fiscal a conclui cu den e caso aki no tabatin peliger extremo cu a hustifica e uso di arma. Segun OM, e polisnan a eherce violencia excesivo contra e victima y asina nan no a comporta segun reglamento. E conclusion di fiscal tabata claro: e accionnan no tabata conforme ley y e polisnan ta culpabel.

Durante e incidente, 20 bala a ser tira den aproximadamente 10 seconde. Di e 20 bala ey, 17 a dal e auto di Lanoy. Un bala a dal e parti dilanti riba e hoed; esaki tabata un di e tres balanan cu sospechoso M. Violenes a tira. E otro dos balanan cu M. Violenes a tira no a dal e auto. E balanan restante tabata di sospechoso R. Dirks, cu a dal e banda robes di e auto y e parti atras tambe.

Segun investigacion forensico di NFI, mirando trayecto di e bala, e herida di entrada y salida riba curpa di Lanoy y



e posicion di e agentenan, e bala cu a alcanza Lanoy tabata e di cinco bala cu a ser tira. E analisis tecnico a mostra cu e bala mortal a bin for di e arma di sospechoso Dirks.

Fiscal a aclaria cu no tin prueba cu e polisnan a tira cu intencion pa mata Lanoy, pero si cu nan a tira cu obhetivo pa stop e auto. No obstante, segun OM, uso di arma riba un auto ta trece riesgo grandi y no ta un medio apropiado pa para un vehiculo. Polisnan a tuma e riesgo aki conscientemente cu na final tabatin consecuencia fatal.

Corte mester evalua si e accionnan tabata corecto y si nan a cumpli cu e criterio di ley. Den ley tin diferente articulo cu ta regula uso di arma. Un polis por saca su arma solamente ora esaki ta completamente y absolutamente necesario. Den situacion extremo, por usa arma ora ta bay haci detencion y e persona tin arma su mes of ora tin peliger inminente di bida. Pero den e caso aki, segun OM, un auto, den caso di Lanoy, no ta automaticamente cay den e categoria di arma mortal cu ta hustifica uso di arma.

Fiscal a describi e hecho di e dia ey, con situacion a desaroya y con esaki a hiba na persecucion. Tur dos sospechoso a declara cu nan a sinti peliger, pero segun OM no tabatin indicacion di peliger inminente. Segun investigacion, na momento cu M.

Violenes a los e prome tiro, e auto a hala atras. OM a indica tambe cu imagennan di video ta muestra cu Lanoy a purba hala un banda pa evita dal e agente policial, no pa bay riba dje.

Pero M. Violenes a declara cu e no por a wak claramente kico persona den e auto tabata haci ni su intencion na e momento, pero el a sigura cu su experiencia di e momento tabata diferente di loke video ta muestra. El a bisa tambe cu no por a hala na banda, mientras cu den e video, segun OM, ta muestra otro.

Fiscal a pone enfasis riba e hecho cu polisnan ta ricibi training pa maneha situacion di presion y cu nan tin un standard diferente cu civil. Nan no por drenta den panico. El a remarca alabes cu e hecho cu un agente policial ta sinti cu su bida tabata na peliger no ta automaticamente hustifica tiromento den defensa propio si circunstancianan obhetivo no confirma e peliger ey.

Fiscal a splica cu Landsrecherche a conduci un investigacion amplio, incluyendo analisis di cada frame di e video di e incidente. Defensa tambe a presenta un rapport prepara pa NFO, basa riba imagennan di camara di seguridad. Fiscal a cuestiona e metodologia y conclusion di e rapport di defensa, argumentando cu no por usa esaki como base confiabel y a pidi

Corte pa no tene e rapport ey den consideracion.

Segun fiscal, aunke Lanoy mester a stop pa polis manera tur hende ta obliga di haci, e polisnan no mester a saca arma asina lihe ni tira den e forma cu nan a haci. Tabatin otro alternativanan pa maneha e situacion, pero nan a scoge pa escala e situacion usando arma di candela sin cu tabatin peliger inminente. Fiscal a yega na conclusion cu e polisnan no a comporta segun reglamento y p'esey nan ta culpabel.

Pa loke ta trata sospechoso R. Dirks, fiscal a argumenta cu na momento cu el a baha for di vehiculo y saca su arma, su colega, M. Violenes, no tabata den peliger inmediato cu a hustifica e accion ey, sinembargo Dirks a tira asina mes. E declaracion di defensa propio, segun fiscal, no ta cumpli cu requisito legal.

Ademas di aspecto penal, OM a trata tambe e demanda di daño presenta pa mayornan di victima. Fiscal a splica cu daño emocional den forma general no ta reconocido como compensacion na Aruba, pero daño material si por ser otorga. Esaki ta inclui gastonan relaciona cu e incidente, manera costonan procedural y gastonan medico. Pa loke ta trata daño di shock, teniendo na cuenta cu mama di Lanoy a ser diagnostica cu "traumatic bereavement reaction", a causa di mester a identifica su yiu morto y otro procesonan cu a afecta, fiscal a pidi Corte pa aproba daño di shock pa e mama, pero no pa tata, ken no a ser diagnostica y tampoco no a sigui cu sesionnan psicologico.

Den su exigencia di castigo, fiscal a declara cu OM kier un sancion cu ta pas y proporciona cu e caso. Ambos sospechoso a ser considera igualmente culpabel, y p'esey exigencia ta mesun pa tur dos. OM a pidi 12 luna di prison condicional, cu un periodo di prueba di dos aña, ademas di 180 ora di servicio comunitario.

Famia di Lanoy a expresa nan descontento cu e exigencia di fiscal mirando cu e ta completamente contrario na loke nan a spera y ta desea.

Despues di audiencia, persofficier di OM, Patrick van der Biezen a duna un splicacion tocante e exigencia. El a indica cu OM a tene cuenta

varios factor. Entre otro, cu e decision cu e polisnan a tuma tabata, a base id investigacion, uno robes, y uno cu tabatin un resultado fatal. OM a mira tambe na tipo di casonan similar den Reino Hulandes y castigonan cu huesnan a impone den situacionnan comparabel.

Un factor cu el a enfatisa ta cu no por compara e caso aki cu caso di un ciudadano comun cu ilegalmente ta posee arma di candela y ta comete un homicidio. Den e tipo di caso ey, puntonan di orientacion pa castigo ta hopi mas halto, frecuentemente 10 pa 12 aña di prison of mas. E tipo di caso ey ta trata di persona cu no tin derecho di usa arma y cu comete delito grave riba caya.

E caso aki, segun Van der Biezen, ta fundamentalmente diferente pasobra trata di polis cu tabata ehecuta nan trabao. Polis tin deber di usa violencia ora ta necesario bao di cierto circunstancianan. Ley ta reconoce cu un polis por actua y usa violencia contra un ciudadano si situacion ta exige esaki. No obstante, ainda dentro di e contexto profesional ey, tin limitacionnan claro. Segun Ministerio Publico, e limitacionnan ey no a ser respeta den e caso di Lanoy.

Corte lo mester evalua tur prueba, argumentonan legal y circunstancianan di e caso pa yega na un decision final. E caso a toca no solamente e famia di Lanoy, sino tambe comunidad amplio, unda pregunta riba uso di forsa, responsabilidad y confiansa den autoridadnan ta keda central.

Na final di e audiencia, hues a splica cu segun ley, si e cera e caso di biaha e lo mester duna un veredicto despues di tres siman. Pero mirando e complejidad di e caso, y e cantidad di argumentonan cu a ser presenta e lo mester tuma mas tempo pa e por pasa door di tur cos cuidadosamente. El a tuma e decision pa no cera e tratamento di e caso, pero mas bien a schors e caso te cu 16 di maart. Riba e dia aki e lo habri e caso y cera esaki di biaha. Alabes e lo duna un fecha pa uitspraak, cual el a menciona cu posiblemente lo por bira dia 2 di april, pero riba e dia aki lo confirma e fecha exacto. Esaki ta duna e hues tempo adicional pa e por repasa tur documento di e caso.

Biento fuerte a obliga barco crucero Island Princess cancela su bishita na Aruba

E barco crucero Island Princess a haya su mes obliga di cancela su bishita planea na Aruba pa diadomingo 22 di februari, pa motibo di biento fuerte y condicionnan insegur den waf, segun un articulo recien di Aruba.nu. E barco a purba di drenta Oranjestad rond di su ora di yegada programa pero no por a mara sigur pa motibo di biento fuerte.

E barco, cu por acomoda mas o menos 2.200 pasahero, a haci intentonan di mara, pero esakinan a resulta mucho riesgoso pa e seguridad di pasaheronan y tripulacion, pues e capitan a dicidi di enbes di conclui su bishita na Aruba, desvia su rumbo back pa Port Everglades na Merca, su waf di origen.

E cancelacion a afecta hopi pasahero cu tabata ansioso pa un dia riba e isla, caminda un variedad di actividad na costa



y atraccionnan local tabata disponibel. E barco tabata ser spera na e waf hunto cu otro barco crucero, pero e condicionnan di clima finalmente a

determina su destino.

Discovery I tabata e unico barco crucero cu por a mara na Aruba diadomingo. El a

yega alrededor di 8:00 a.m. y tabata programa pa keda te 8:00 p.m., proveendo asina un otro fuente di turismo pa negoshinan local.

Biento fuerte por causa cambionan repentino den orario di barconan crucero. Capitan y tripulantenan constantemente ta vigila informenan di clima y protocolnan di seguridad pa determina si ta sigur pa mara na un waf. Den algun caso, manera diadomingo na Aruba, e biento por aumenta te na un grado cu e ta trece riesgonan pa mara—specialmente pa barconan crucero grandi—haciendo salida y rerouting e unico opcionnan responsabel.

E cancelacion di un parada di crucero planea por tin consecucionnan significativo pa e sector di turismo di Aruba. Hopi biaha clima den Caribe ta hunga un rol significante den planificacion y ehecucion di bishitanan di barconan crucero, specialmente durante temporada halto ora ta spera multiple barco pa dia.

Defensa den caso Caret:

Polisnan a actua segun nan percepcion di menasa

Durante dos dia di tratamiento di caso Caret, abogadoan di defensa Demis Illes y Vito Carlo a presenta nan argumento dilanti corte. Nan a cuminsa expresando condolencia na famia di e victima y a enfatisa cu den e tragedia aki no tin ganador, solamente tristesa pa tur esnan involucra.

Defensa a subraya cu nan clientenan no a desea pa e situacion termina di un forma tragico. Segun nan, e sospechosonan tabata checuta nan trabou y ta importante pa corte tene cuenta cu, a pesar di hopi expectativa social, polisnan tambe ta ser humano. Den situacionnan di presion halto, un hende por actua bou di adrenalina, miedo y panico, cu solamente secondenan pa reacciona y tuma decisionnan cu por tin consecucionnan serio.

Nan a pidi corte pa evalua e hecho di manera obhetivo, teniendo na cuenta loke e agentenan a percibi den e momento di e incidente. Defensa a sostene cu nan declaracionnan no a ser exagera, sino tabata un relato honesto di nan experiencia. Polisnan, nan a bisa, no ta machine sino



hende den uniform.

Segun defensa, e anochi di e incidente tabata particularmente ocupa. E agentenan tabata trahando dobel shift y a responde na varios incidente. A pesar di e carga di trabou, nan a ehecuta varios control di trafico sin problema prome cu e encuentro fatal.

Defensa a indica cu e agentenan a duna orden cla pa e

vehiculo para. Ora e chauffeur no a cumpli, protocol ta exige cu polis mester persigui te ora logra detene e auto. Segun nan, si e chauffeur lo a para, e caso no lo a termina tragicamente. E decision di no para a crea tension y sospecha tocante loke por tabata tras di su conducta.

Pa loke ta trata e investigacion di Landsrecherche, defensa a cuestiona parti di e analisis di e material visual, special-

mente e determinacion di e momento exacto di e prome tiro.

Un punto central tabata actuacion di sospechoso M. Violenes. Defensa a bisa cu su declaracion a keda consistente, hasta despues cu el a mira video. El a relata cu e vehiculo tabata move den su direccion, loke el a percibi como un menasa inmediato contra su bida. Den e circunstancia ey, e no por a determina si e chauffeur tabata kier sigui huy of si e tabata bay dal'e cu e auto.

Defensa a argumenta cu e prome tiro a sucede den e momento cu e auto a move den su direccion, prome cu el a hala un banda. Den su percepcion, e auto por a ser considera un arma potencial na e momento ey.

Segun defensa, M. Violenes no a baha for di su vehiculo cu arma den man ni cu intencion premedita pa tira. Nan a caracteriza su accion como un reaccion inmediato —“actie-reactie”— riba un movimiento cu el a interpreta como menasa directo.

Pa loke ta trata sospechoso R. Dirksz, defensa a indica cu

el a baha for di su vehiculo despues cu su colega a baha, manera ley ta indica. Ora el a observa cu e auto tabata move den direccion di su colega, e tambe a reacciona. Intencion di ambos agente, segun defensa, tabata pa detene e auto y controla e situacion, no pa causa morto.

Defensa a conclui cu tur evento a desaroya den un fraccion di seconde, sin espacio pa considera otro opcionnan manera hala un banda, bolbe subi den auto of tira riba otro parti di e vehiculo manera e tairanan, mirando con cerca e auto tabata.

Finalmente, nan a pidi hues pa studia e imagennan den e rapport di NFO cu nan a entrega cu ta muestra un bista cronologico di e suceso. Segun defensa, esey ta confirma cu M. Violenes no a baha cu arma den man ni a saca su arma prome cu e momento critico.

Defensa a cera enfatisando cu nan ta compronde e dolor di e famia, pero esey no por ta motibo pa ignora con e sospechosonan a biba e hecho y e circunstancianan den cual e polisnan a actua.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart-Boekhoudt

Redaccion

noticia@bondia.com

Pilar Flores (hefe di redaccion)
Angenette Figuereo (closer editor)

Leo Maduro

Dilma Arends

Raisa Montilla

Oriana Geerman

Ehecutivo di Benta

Sulaika Croes

sulaika.croes@cspnv.com

Mark Gomes

mark.gomes@cspnv.com

Aviso y Arte

Sandra Loefstop

Lisa Tromp

Departamento Digital

Juan Luis Pinto

Administracion

accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)

Pablo Libre

Press

Roland Schenker (Hefe)

Omar Ramirez

Martin Boekhoudt

Francis Dirksz

Colaboracion

Associated Press

Ret Karibense

Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22

Tel: 582-7800

Email: noticia@bondia.com

aviso@bondia.com

info@bondia.com

Website: www.bondia.com

Facebook: @bondianoticia

Instagram: bondiaaruba

BON DIA ARUBA ta un corant
redacta y imprimi na Aruba y ta
obenibel di dialuna te cu diasabra.
Ningun contenido por wordo reproduci
sin permiso di editor.



Editorial

Decision di pasado... Ta persigui nos awe...

E presencia na Aruba di e delegacionnan parlamentario di e otro teritorionan den Reino a duna algun punto positivo cu normalmente nos no ta haya pa mira. Un di nan ta e presentacion di directora di Direccion Asunto Adulto Mayor a duna durante e deliberacionnan di IPKO. Un exposicion hopi mas completo di loke nos a mira te awor, pa esey nos aprecio. Di otro banda, esaki ta e tipo di informacion cu henter comunidad mester haya. No pa tuma nota y no haci nada cune; e tema di enbehecimento di nos poblacion ta bay tin un cantidad di consecuencia grandi pa nos, tambe financiero, y te awor nos ta haya de vez en cuando un advertencia di cierto banda, pero no ta mira ainda un maneho general y coherente ta surgi for di seno gubernamental. Ta di spera cu awor si por cuminsa mira esey. Pero, ta importante reconoce cu loke ta presenta awe como problema, tabata previsible den pasado caba.

Un promer aspecto ta e gastonan relaciona cu e cuido aki. Aki nos por mira un cierto contradiccion financiero ta surgi. Di un banda nos tin un grupo creciente di ciudadano no naci na Aruba, cu durante e periodo unda nan tabata traha ainda, ya tabatin problema pa tene cabez riba awa, pero ora nan stop di traha e problemanan financiero ta bira mas serio, nan AOV parcial no ta yega ni pa cubri un parti minimo di un lugar den un cas di anciano priva. Aki ta surgi un asunto clave di maneho: si gobierno ta opta pa mantene e modelo di cuido actual, unda mas o menos mitar di e capacidad ta den fundacion subsidia y e otro parti den institucion di iniciativa priva, no ta asina dificil pa mira un problema grandi, cu gobierno so por resolve: un creciente necesidad di capacidad di cama, mientras un parti creciente lo no tin acceso na cuido priva, pasobra nan no tin e medionan pa financia esaki. Es mas, ni tempo nan tabata traha nan salario no tabata yega na casi Afl. 3.000 pa nan por cubri e costo di nan cupo. Esaki ta un asunto cu nos tin años ta discuti, unda tabata previsible cu algun dia nos lo a haya consecuencia di e importacion masivo di labor, cu a bin pa keda. E pregunta, den e discusionnan di 30 aña pasa tabata, si tabatin alternativa pa evita esaki. E contesta tabata cu si, pero ta requeri un sistema rotativo, unda en principio un trahador stranhero despues di un tempo stipula mester bandona nos pais y mester trece otro persona pa haci e trabao, si – ainda – no tin forza laboral disponible pa tuma e cupo. E tempo aya e scucha tur tipo di argu-

mento, bon y malo. Por ehemplo, cu ta un peso empresarial grandi pa cada vez emplea hende cu pa un gran parti ta haya nan training ‘on the job’ y despues di algun aña mester ripiti esaki. No cu mester ta full di acuerdo cu e opinion aki, pero e tabatin un base den realidad. Otro tabata e casi acusacion cu bo mester ta inhumano ‘pa kier saca hende for di Aruba despues cu nan a yuda desaroya nos isla’. Sin embargo, esaki tabata e manera con, despues di caida di empleo den industria petrolero den añanan 50 y 60 di siglo pasa, a percura pa salida di miles di famia for di nos isla, di hopi mucha tambe cu a nace aki pero cu mester a bay cu nan mayornan pa nan pais di origen. No tabatin critica cu nos tabata ‘inhumano’... Pero enfin, mundo a cambia y dentro di Reino tambe a suaviza ley di nacionalidad, treciendo e estadia obligatorio te na cinco aña. Y a base di e argumentonan bon y malo aki a tuma e decision cu ‘nos no ta mal hende’ y tur hende mester tin e oportunidad pa keda aki. E tempo aya caba a adverti pa loke ta sucediendo awor. Pero, esaki ta significa cu nos ta limita nos mes na un ‘told you so’ y laga e asunto te ey? No, nos ta di opinion cu mester actua segun e compromiso di tanto aña pasa y esey ta implica cu como comunidad nos ta acepta e compromiso di garantiza tur hende un bida digno, den un ambiente apropiada, te dia nan bandona e mundo aki. Cualquier comunidad cu ta respecta su mes, mester actua asina.

E consecuencia di e opcion adopta tanto aña pasa ta aparece awor y ta encera cu nos mester paga, pa henter e sector... Y no solamente e parti di asistencia subsidia caba, sino tambe e parti priva. Sino haci esaki, e cuido priva no ta bira accesible nunca, hustamente pa e grupo cu tin mas mester di esaki. Tambe e apoyo na e parti di cuido cu ta tuma lugar den famia, cu no por ta encarga cu henter e cuido pasobra gran parti di esnan mas hoben den un famia ta traha y mas tanto den full-time job. Lo ta logico si pa aki aplica un sistema di contribucion segun ingreso financiero. Por ultimo, no por keda sin contempla e realidad cu nos comunidad pronto oficialmente tin miles di persona mas cu ainda ta migrante indocumenta, cu por contribui cu e gastonan menciona di cuido di anciano, emplea pa empresa serio cu ta paga nan obligacionnan como empresario. Menos mal, cierto di nos lo bisa, pero... nos a scucha caba si e porta di entrada na nos pais ta keda hanchu habri, pa nos haya repeticion di pasado?

26 profesional di Departamento di Impuesto ta gradua di Basisopleiding Belasting

E siman aki, minister di Finanzas, Asunto Economico y Sector Primario, mr. Geoffrey Wever (Futuro) tabata presente na ceremonia oficial di graduacion di e Basisopleiding Belasting, un trayecto formativo intensivo dirigi na profesionalnan di Departamento di Impuesto.

No menos cu 26 empleado a finalisa cu exito e programa cu a cuminsa na october 2024 y a conclui na december 2025. E graduadonan a sigui e opleiding tres biaha pa siman, despues di nan ora regular di trabou, demostrando un compromiso extraordinario cu profesionalisacion y mehoracion continuo. Den su discurso, Minister



Wever a comparti su pasion pa e tema di derechonan fiscal y a subraya cu colecta di entradanan no ta solamente un mecanismo tecnico pa recauda fondo, sino un pilar fundamental pa sostene fi-

nanzas publico solido y sostenibel. Minister Wever a enfatisa cu e rol di un fiscalista ta exige mas cu solamente dominio tecnico. E ta exige pasion pa e profesion, sensibilidad hu-

mano y capacidad pa aplica ley na un manera servicial. Minister Wever a subraya cu gobierno ta sigui inverti den mehoracion di proceso, incluyendo digitalisacion y sistema online, cu lo contri-

bui na un maneho mas eficiente y transparente di impuesto. Segun Minister Wever, capacitacion continuo di personal ta esencial pa adapta cu e evolucion tecnologico y cambianan den regulacion fiscal.

Minister Wever a expresa su gradicimento na Sra. Luenne Gomez-Pieters y su team pa organisa e Basisopleiding Belasting.

Cu e graduacion aki, Gobierno ta reafirma su compromiso cu fortalecimiento institucional, profesionalisacion di servicio publico y consolidacion di un sistema fiscal moderno cu ta beneficia tur ciudadano di Aruba.

Entrega di relato anual 2025 Raad van Advies



Dia 18 di februari 2026 Raad van Advies a entrega pa medio di Presidente (mr. D.G. Kock) y Secretario di Raad (mr. A. Braamkamp) su relato anual 2025 na Gobernador y na Minister-President.

Manera ta custumber e relato anual ta duna un bista habri y transparente di e tareanan y trabounan di Raad van Advies y su Wetenschappelijk Bureau como tambe un bista total di e consehonan duna den

e aña cu a pasa.

Den su palabra di introduccion, e Presidente ta pidi atencion pa e echo cu 2025 tabata un aña historico den hopi sentido. E ta referi entre otro na e cantidad abao di productonan di ley cu a keda entrega na 2025. Pero tambe na e hecho cu hopi legislacion cu den un of otro momento a keda cualifica como prioridad, a keda pega den e proceso di legislacion of ta warda añanan largo pa implementacion. Reflechando riba 40 aña Status Aparte, e desaroyo aki ta preocupante, pasobra e por afecta e credibilidad

y efectividad di e proceso legislativo.

Un topico cu a causa hopi debate den 2025 ta e supervision di presupuesto (begrotingstoezicht). Pa e motibo ey Raad van Advies a elabora riba e tema aki den su relato anual. E ta haci esaki for di perspectiva di Raad, aunke e propuestanan di ley, esta un propuesta di rijkswet y un propuesta di landsverordening, no a wordo manda pa Raad van Advies ainda. Cu e tema di e relato anual a opta pa contribui na un debate mas trankil door di pone algun puntonan tras di otro pa asina tur partido, natu-

ralmente cu e interes di pais Aruba na mente, por yega na un decision cu ta bon pensa. Un discusion habri y dirigi riba contenido, tambe den cuadro di e reflexion nacional rond di 40 aña Status Aparte. Aña di hubileo (2026) ta un momento apropia pa evalua si despues di cuatro decada di Status Aparte nos estado di derecho y fundamentonan democratico ta suficientemente hancra den nos realidad estatal y social.

E relato anual 2025 completo encuanto ta disponibel riba e website di Raad van Advies www.rva.aw.

Minister Arthur Dowers a ricibi presentacion riba exploracion di petroleo

Recientemente, Minister di Husticia, Integracion, Transporte Publico y Energia, mr. drs. Arthur Dowers (AVP) a ricibi un

presentacion amplio for di ehecutivonan di Compania Arubano di Petroleo (CAP) relaciona cu e status di trabaonan di

exploracion di petroleo y gas natural. E reunion a enfoca riba desaroyo energetico sostenibel y responsabel.



Durante e presentacion, CAP a duna un update di e trabaonan cu ta den proceso door di Armstrong Oil & Gas den cuadro di exploracion di petroleo of gas natural den awanan teritorial rond Aruba. E proceso di exploracion ta avansa conforme planificacion tecnico, respetando tur norma internacional y rekisito legal cu ta aplica pa e tipo di actividad aki. E siguiente fase ta determina cua sitio ta mas prometedor pa inicia cu boramento, un proceso cu tambe lo rekeri su tempo y cautela. E fase den cual Armstrong Oil & Gas ta aden, ta

uno hopi costoso pero necesario pa por yega eventualmente na boramento. Esaki no ta un proceso rapido, sino un trayecto tecnico cu lo dura varios luna prome cu tin claridad total. E fase actual ta enfoca riba investigacion cientifico, coleccion di data y evaluacion geologico, cu lo sirbi como base pa cualkier decision den futuro. Transparencia, responsabilidad y interes nacional ta keda central den tur paso cu ta

considera, segun un comunicado di gobierno. Minister Dowers a enfatisa cu gobierno lo sigui monitorea e proceso cu hopi atencion, teniendo como prioridad proteccion di medio ambiente, seguridad di comunidad y beneficio economico pa pueblo di Aruba. Cualkier desaroyo potencial den sector energetico mester tuma lugar den un marco di sostenibilidad, cu respet pa nos generacion actual y futuro.

Onder curatele stelling

Bij beschikking van 4 november 2025 behorende bij AUA 202502188 EJ van het Gerecht in Eerste Aanleg van Aruba, is onder curatele gesteld Mw. Juanita Paulina Rasmijn, geboren op 20 oktober 1955 in Aruba. Benoemd als curator is haar broer, Victoriano Victor Rasmijn, geboren op 6 maart 1957 en wonende in Aruba.

De curator,
Victoriano Victor Rasmijn

AWA

MINI MEGA

MEGA PLUS

Awo cu 2 florin mas, bo por gana e

*** Afl. 360.000,-**

* Afl. 260.000,- + Afl. 100.000,-
extra

Benta ta sera 7:30 pm y sorteo ta hunga 7:45 pm

MEGA PLUS



HUNGA AWO



Salud Publico ta monitor activamente

Pa detecta caso di Sarampi of Chikungunya tempran

Ta tarea di Departamento di Salud Publico di Aruba (DVG) pa continuamente monitorear e situacion regional encuan to malesa nan infeccioso cu por influencia salud di nos poblacion. Pa e motibo aki cu Salud Publico ta monitor activamente caso nan di Sarampi y Chikungunya cu ta creciendo den region.

Segun ultimo dato nan disponibel, den region di America (PAHO), tin un total di 1031 caso di sarampi registra, di cual mayoria ta den Mexico y Merca.

Pa lora ta trata Chikungunya, tin dos caso registra e aña aki na Aruba cu a wordo importa for di pais nan cu ta experienciando brote di Chikungunya. Segun ultimo dato nan disponibel di PAHO, den continente Americano tin un total di 2351 caso confirma di Chikungunya y 1 morto a causa di Chikungunya registra.

Pa Aruba por evita importacion di sarampi of transmision local di chikungunya ta



importante y necesario pa no solamente organisacionnan di salud traha hunto pa señalá y detecta casonan potencial trempan, pero ta importante pa comunidad tambe ta bon informa y sa kico pa haci ora nan tin cierto sintomanan of ta pensa di a wordo exponi na un di e malesanan aki riba menciona.

Sarampi.

Ta un malesa altamente contagioso cu ta pasa di hende pa hende na momento cu un persona cu ta contagia cu e virus ta tosa, nister of supla nanishi. Na momento di tosa of nister, particularnan di e vi-

rus ta keda algun rato den aire y despues ta cay riba superficie unda un otro persona por piki esaki cu su man y atravez di boca, nanishi y wowo lagando e virus drenta den su curpa. Despues cu e virus a drenta e curpa dentro di 7 cu 14 dia e persona ta cuminsa presenta sintoma di:

- Keintura halto
- Nanishi ta core
- Tos seco
- Wowo cora of inflama
- Dolor di garganta

- Cansancio fuerte
- Manchanan color cora riba cuero (rash), cu ta cuminsa na cara y despues ta plama riba curpa

Ta importante cu un persona ta presenta e sintomanan aki tuma contacto telefonico cu su dokter di cas, sigui tur instruccion di su dokter y evita contacto cu demas persona.

Chikungunya.

Chikungunya ta un malesa viral cu ta wordo transmiti pa e mesun sangura cu ta transmiti Dengue (sangura pata blanco). E sintomanan mas comun ta:

- Keintura diripiente,
- Dolor fuerte di articulacion nan (pols, enkel, ru dia, elleboog p.e.),
- Dolor di cabes,
- Dolor di musculo,
- Cansancio
- Rash riba cuero (tin bi-aha)

Normalmente e sintomanan ta presenta entre 2 cu 12 dia despues di a wordo pica pa un sangura infecta cu e virus. Ta importante cu un persona cu ta presenta e sintomanan aki (y den caso cu bo ta regresa di un pais cu tin brote di Chikungunya) tuma contacto telefonico cu su dokter di cas, sigui tur instruccion di su dokter y percursa pa e no wordo pica mas pa sangura. Haci esaki door di elimina criadero nan potencial, bisti paña cu man y pia largo, usa repelente contra sangura y evita areanan scur unda sangura gusta sconde.

Pasobra Bo Salud ta nos Prioridad, DVG ta sigui mantene comunidad bon informa.

Pa mas informacion like nos Facebook page Directie Volksgezondheid DVG Aruba, Follow nos riba Instagram [directie_volksgezondheid_aruba](#), of Follow nos den WhatsApp Channel, subi nos website [www.dvg.aw](#), yama nos na 5224200 of mail nos na [servicio@dvg.aw](#)

Boticanan online ta comparti dato sensitivo di salud cu Google, Meta y TikTok, segun investigacion

(NLTimes) Boticanan y tiendanan online supuestamente ta comparti dato di consumidor sensitivo cu plataforman di aviso. Un investigacion conhunto di Investico y Radar di 20 botica y tiendanan online incluyendo Etos, Trekpleister, Kruidvat, Flink, DA y Bol.com a descubri cu tur 20 ta transmiti informacion di bishitante pa Google.

Dies di e tiendanan aki, incluyendo Etos, Albert Heijn, Jumbo, y Bol.com tambe ta comparti dato personal cu Facebook. DA, Flink y Plein ta provee dato pa TikTok,

unda DA sa manda adresnan di email. E informacion ta inclui detayenan sumamente priva tocante compran of bista di productonan di salud, manera self-testnan.

E compartimento aki ta sucede ora bishitantenan acepta cookies. Esnan cu ta nenga cookies por preveni nan dato ser manda pa Facebook, pero 15 di e boticanan supuestamente ta keda transmiti informacion medicamento sensitivo pa Google hasta ora e usuario nenga cookies. Radar ta nota cu bishitantenan frecuentemente no ta consciente cu nan interaccion cu e productonan aki ta ser pasa

na companianan di aviso externo.

Ora investigadornan a tuma contacto, varios compania grandi a reconoce erornan. Flink a confirma e descubrimientonan, admitiendo cu e rastreo no mester a pasa, y a bisa cu awor a pone un blokeo tecnico pa productonan sensitivo. Jumbo tambe a confirma cu dato di producto medico ta ser comparti cu Google, Facebook y Pinterest, y a reporta e asunto na e Autoridad Hulandes di Proteccion di Dato como precaucion.

Bol.com a bisa cu el a pone filter na luga pa preveni uso



di interaccion di producto sensitivo den avisonan personalisa pero ta evaluando mas medida.

DA, Albert Heijn y Etos, sin embargo, a disputa cu e compran aki ta cualifica

como dato personal special, argumentando cu comprando un test di embarazo no ta indica automaticamente algo di e persona su salud, como cu e producto por ta destina pa un otro persona.

Ex parlamentario di Corsou ta mantene inocencia den apelacion

(CuraçaoChronicle) - Ex parlamentario y lider politico di KEM, Michelangelo 'Lo' Martines, un biaha mas a insisti riba su inocencia, declarando cu nunca el a usa e telefonnan asina yama SKY. Martines a haci e declaracion diahuebs durante e audiencia di su apelacion.

Martines a keda aresta den november di 2024, y un año despues den november 2025, a ricibi sentencia di Corte di Prome Instancia pa 7 año den prison. Corte a haya cu el a comproba cu e tabata involucra den varios operacion di trafico di droga y den labamento di aproximadamente 2 miyon florin.

Segun e decision, Martines a hunga un rol di organisacion y coordinacion den cargamento di cocaína entre Corsou, Panama y Europa.

Den su decision, corte tambe a enfatisa cu Martines a comete e ofensanan mientras e tabata un miembro activo di Parlamento, dunando e un funcion como ehempel di pueblo. Corte a señala na condenanan den pasado pa trafico di droga na ambos Corsou y Hulanda.

Martines a rechasa e acusacionnan consistentemente y inmediatamente a entrega un apelacion despues di e veredicto. Durante e audiencia, el a reitera cu e ta inocente y a rechasa cu el a haci uso di e telefonnan SKY, cual ta algo prominente den investigacionnan criminal internacional.

E caso lo sigui dia 9 di april, ora cu corte lo tin un audiencia di preparacion pa determina e proximo pasonan den e proceso di apelacion.



Gobierno di Corsou ta sigui aproba proyectonan sin financiamiento completo

(CuraçaoChronicle) - Gobierno di Corsou ta sigui aproba proyectonan y iniciativa di politica sin cobertura financiero completo sigura, segun e rapport di maneho financiero pa e di 4 kwartaal di 2025.

E rapport ta señala cu varios decision a ser tuma mientras cu recurso di fondo ta keda incompleto of incierto, au-

mentando e presion riba presupuestonan den futuro.

Den varios caso, proyectonan a ricibi aprobacion politico aunke e implicacionnan di termino largo financiero no a keda completamente incorpora den e cuadro di e presupuesto. Esaki ta crea un situacion den cual e gastonan ta keda core pa varios año, potencialmente resultado den

deficit inespera of e necesidad pa medidanan di coreccion.

E rapport ta nota cu e practica aki ta debilita disciplina di presupuesto, mientras compromisonan financiero ta haci prome cu autorisacion di presupuesto formal. Como resultado, parlamento su habilidad di por tin acceso na prioridadnan y intercambio di adelanta ta reduci, cambi-

ando e control financiero den direccion di ahustenan.

E tipo di strategia aki ta aumenta riesgo fiscal, particularmente den un ambiente unda Corsou su espacio financiero ta keda limita y supervision externo ta keda na luga. Ora cu varios iniciativa tin falta di financiamiento cla, e impacto acumulativo por debilita e estabilidad general di

presupuesto.

FMR ta adverti cu aprobacion continuo di proyectonan sin financiamiento ta complica e plan financiero di termino medio y por restringi decisionnan futuro den politica. Fortalece e evaluacion financiero pa e motibo aki ta identifica como un condicion clave pa mehora sostenibilidad fiscal.

Curaçao:

Rapport financiero ta confirma advertencianan di institucionnan di supervision

(CuraçaoChronicle) - Financial Management Report (FMR) pa e di 4 kwartaal di 2025 ta confirma varios di e preocupacion cu e institucionnan di supervision a trece dilanti pa varios año tocante Corsou su finanzas publico y gobernacion..

E resultadonan ta imita di cer-

ca e advertencianan di College financeel toezicht (Cft) y Algemene Rekenkamer Curaçao, fortaleciendo e conclusion cu debilidad structural ta keda sin resolve.

E rapport a demostra cu a pesar di programanan di reforma, plannan di accion y varios compromiso, problemanan fundamental den control fi-

nanciero, transparencia y capacidad di ehecion ta persisti. Problemanan manera data incompleto, reforma atrasa, gobernacion fragmenta y supervision insuficiente di riesgo tur tabata presente di manera prominente den rapportnan y cartanan di conseho anterior. FMR awo ta reconoce e fayonan aki for di dentro di gobierno mes.

Cuerponan di supervision for di hopi tempo caa a adverti cu progreso riba papel no ta automaticamente traduci na cambio efectivo. FMR ta sostene e evaluacion aki pa medio di muestra cu varios reforma ta keda den fase di proceso na luga di ta operacional. Medidanan hopi biaha ta describi como "andando," "den desaro" of "den plan," mientras cu resultado concreto den e maneho financiero diario ta keda limita.

E rapport tambe ta alinea cu preocupacionnan anterior tocante erosion di e disciplina

di presupuesto ora cu proyectonan ta aproba sin cobertura financiero completo y ora cu supervision parlamentario ta debilita pa informacion cu no ta completo of laat. Ambos Cft y Algemene Rekenkamer den varios ocasion a enfatisa cu e practicanan aki ta aumenta e riesgo fiscal y ta debilita responsabilidad democrático.

Otro tema cu ta mira hopi ta e falta di evaluacion comprensivo di riesgonan dentro di e sector colectivo. FMR ta confirma cu e entidadnan clave te ainda no ta completamente consolida den rapport financiero, un punto cu institucionnan di supervision a enfatisa como un vulnerabilidad grandi, particularmente den bista di presionnan demografico y costonan di cuido di salud cu ta den aumento.

Pa medio di papia tocante e advertencianan anterior aki, FMR ta enfatisa cu Corsou su desafionan financiero no ta un incidente sino structural. E



rapport ta sugeri cu mehora-cion lo rekeri no solamente plannan nobo, sino implementacion sosteni, responsabilidad mas cla y coordinacion institucional mas fuerte.

Ora cu tuma nan hunto, e resultado ta indica cu mientras intencion di reforma ta presente, e diferencia den ambicion y ehecion ta sigui defini Corsou su maneho financiero publico. E confirmacion di preocupacion di supervision di hopi tempo ta agrega urgencia na e yamado pa accion mas decisivo y profundo pa fortalece gobernacion y restaure confiansa den e pais su cuadro financiero.

Onder curatele stelling

Bij beschikking van 23 februari 2026 behorende bij AUA 202502189 EJ van het Gerecht in Eerste Aanleg van Aruba, is onder curatele gesteld Mw. Juliana Rasmijn, geboren op 16 februari 1947 in Aruba. Benoemd als curator is haar broer, Victoriano Victor Rasmijn, geboren op 6 maart 1957 en wonende in Aruba.

De curator,
Victoriano Victor Rasmijn

Jetten huramenta como e premier Hulandes mas jong den historia

(AFP) – Un gobierno Hulandes nobo a asumi poder dialuna, cu Rob Jetten, 38, huramenta como e prome minister mas jong den historia di e pais, y e prome abiertamente gay.

“Huramenta. Nos ta bay cuminsa. Ban traha,” Jetten a post riba X cu un potret di su gabinete posando cu rey Willem-Alexander riba trapi di palacio real.

Jetten a logra un victoria sorprendente den eleccion na october, bahando e partido di derecha Partido pa Libertad (PVV) lidera pa Geert Wilders cu un margen minimo.

E eleccion a keda convoca despues cu PVV a retira di e coalicion anterior, e gobierno mas derechista di Hulanda den historia recién, cu a dura apenas 11 luna.

D66 di Jetten a uni partido di centro-derecha CDA y e liberal VVD pa forma un coalicion, pero ta bay falta nueve asiento pa logra un

mayoria parlamentario, cu apenas 66 adiento. E partidonan a tuma 117 dia pa forma nan coalicion – hopi menos cu e 223 dia cu a tuma e gobierno anterior.

Despues di su victoria den eleccion, Jetten a declara cu ta posible pa derota movemetonan populista “si bo campaña cu un mensahe positivo pa bo pais.”

Durante campaña, Jetten a bisa cu e tabata kier “trece Hulanda back den curason di Europa pasobra sin cooperacion Europeo, nos no ta niun caminda.”

Den un manifesto publica na januari, e tres partido a priminti sosten completo pa Ucrania y a priminti di cumpli cu e compromisonan di gasto di NATO pa e pais.

Signatura derechista

A pesar cu e gobierno nobo no ta mesun leu den derecha cu esun anterior, ainda tin un

“signatura derechista,” segun Sarah de Lange, profesor di politica na universidad di Leiden, a bisa AFP.

“E coalicion a opta pa corta presupuesto en bes di bay den deficit pa financia inversion cu kier haci,” y tin “continuidad substancial entre e plan di inmigracion di e gobierno nobo y esun anterior,” De Lange a bisa.

E partidonan a priminti di continua cu un accion contra migracion, incluyendo medida manera regla mas pisa riba reunificacion familiar.

E coalicion di Jetten tambe a priminti di corta den beneficio social, incluyendo beneficio di desempleo, pa yuda financia inversion proponi den ehercito y defensa.

Pero ya cu e coalicion ta bay depende riba sosten di partidonan di oposicion pa pasa legislacion, “logra pa parlamento pasa reforma mas grandi ta bay dura mas largo cu usual,” De Lange a bisa.



Presidente di Comision Europeo, Ursula von der Leyen a ricibi di bon manera e huramentacion di Jetten, kende a declara su mes como pro-Europa. “For di economia te seguridad – hunto nos ta bay traha pa beneficio di Hulanda y henter Europa,” Von der Leyen a bisa, kende a anuncia un reunion cu e premier Hulandes nobo na Bruselas proximo siman.

Salida di Wilders

Jetten y su gabinete a keda huramenta dialuna pa rey Willem-Alexander na Huis Ten Bosch na Den Haag. E prome minister inicialmente tabata mas interesa den un coalicion mas amplio, incluyendo e isquierdista Groenlinks/PvdA, pero lider di VVD, Dilan Yesilgoz a opone esaki firmemente.

Wilders, kende a sacudi escena politico di Europa te na su

raiz cu un victoria impactante na november 2023, a mira su suerte cay den eleccion aña pasa.

Su partido PVV a cay di 37 asiento na 2023 pa apenas 26 asiento despues di loke a ser mira como un campaña decepcionante.

PVV toch a keda na di dos lugar, pero tur partido den e coalicion a descarta traha cu Wilders, lagando e sinta na banda. “No ta mi gabinete,” Wilders a tweet.

Otro partidonan di derecha a registra avance den e di cinco economia mas grandi di Europa, sinembargo.

Forum pa Democracia, lidera pa Lidewij de Vos, 28, a gana cuatro asiento den eleccion 2025 cu un mensahe contra “inmigracion descontrola” y e “EU sin speransa.”

Partido JA21 tambe a ascende, ganando ocho asiento y casi sigurando un posicion na mesa di gabinete prome cu Jetten a blokea nan.

Residentenan Hulandes tin menos confiansa den otro

Specialmente entre esnan cu nivel di educacion mas abao

(NLTimes) – Hende bibando na Hulanda generalmente ta satisfecho cu nan propio bida, pero nan confiansa den otro ta bahando. E reduccion aki ta mas evidente entre hende cu nivelnan mas abao di educacion, of cu tin menos entrada. Y esey ta un manifestacion di desigualdad, segun Instituto Hulandes pa Investigacion Social (SCP) a bisa den su rapport *Desaroyo Social y Cultural 2026*, cu ainda no a keda publica, pero mira pa NRC.

Entre 2024 y 2025, 61 por ciento di residente Hulandes a responde “si” ora a puntra si nan ta confia mayoria di hende, un reduccion for di 69 por ciento den e periodo entre 2021 y 2022. E reduccion ta preocupante, pero no ta un desaroyo nobo.

Loke SCP ta haya hopi preocupante ta e gap creciente entre hende cu educacion mas halto y entrada y hende cu menos educacion y entrada. Di esnan cu menos educacion, apenas 47 por ciento ta

kere cu por confia mayoria di hende, compara cu 73 por ciento di hende cu educacion halto. Entre esnan cu entrada abao, 50 por ciento ta haya otronan confiable, compara cu 68 por ciento di esnan cu entrada halto.

“Nos ta mira ampliamente cu hende di gruponan cu menos entrada of esnan cu, por ehempel, apenas educacion primario como nan nivel mas halto di educacion, tin menos confiansa,” investigador di SCP, Roel Willems a bisa e corant. Esaki ta pa motibo di varios factor. Hende den e gruponan di poblacion aki usualmente ta biba den barioman mas vulnerable, unda e tasa di crimen por ta mas halto, por ehempel. Nan tambe usualmente tin un opinion menos positivo di bida. “Esaki tambe ta contribui na menos confiansa mutuo.” Hende den e gruponan aki tambe ta sinti menos conecta cu nan bario.

SCP a resalta cu un falta di confiansa ta un forma di desigualdad, y ta demostra cu sosten di entrada riba su mes

no ta suficiente pa combati esaki. “Na SCP, nos kier sigui enfatisa esaki: desigualdad no ta djis tocante si un persona tin placa, un cas grandi of menos pa gasta: e tambe ta tocante asuntonan no material, y falta di confiansa ta un di nan.”

E rapport di SCP tambe ta urgi e gobierno nobo pa haci algo tocante e desconfiansa creciente den politica. E confiansa aki ta abao den tur grupo, cu residentenan di Hulanda dunando parlamento 5.2 di 10, en averahe. Hulandesnan ta considera politica “insensible” y incapaz di compronde preocupacion di ciudadanonan. Nan tambe tin tiki confiansa cu gobierno por resolve problema adecuadamente. E opinion negativo aki ta comparti den tur nivel di entrada y educacion. “E falta di confiansa aki ta andando pa un tempo caba,” Willems a bisa. “Como gobierno, bo mester crea expectativa realistico. Politiconan a haci erornan mayor den esaki den añanan recién.”

TRABOU DI MANTENCION RIBA LIÑA DI DISTRIBUCION CALBAS
Interupcion di Coriente Planea

En conexion cu trabounan necesario pa mantene un suministro di coriente confiable, e servicio di coriente lo wordo interumpi:

Diahuebs, 26 di februari 2026
8:30 AM te cu 3:30 PM

Den vecindario di:

- Calbas (un parti)
- Gabilan (un parti)

N.V. ELMAR ta pidi disculpa pa e inconveniencia cu e interupcion di coriente aki por causa.

Bishita www.elmar.aw pa mira e lista di adresnan afecta.

Danki pa e comprension.

ELMAR

Mexico: Decenas morto den violencia despues di asesinato di lider di CJNG

(AFP) - Binticinco tropa Mexicano a muri den enfrentamento cu combatientenan di cartel despues di un accion cu a resulta den morto di e capo di droga mas busca na e pais, segun un oficial top di seguridad a bisa dialuna.

Nemesio "El Mencho" Oseguera, lider di Cartel Jalisco Nueva Generacion (CJNG), a resulta herido diadomingo den un tiroteo cu soldadnan na e pueblo di Tapalpa, den estado Jalisco, y a muri mientras tabata transportando e pa Ciudad de Mexico, segun ehercito a bisa.


Noticia di su morto a genera espasmo di violencia, cu miembronan di cartel na henter e pais blokeando caminda na 20 estado y kiman do vehiculo y negoshi.

Al menos 25 miembro di Guardia Nacional a ser asesina den enfrentamentonan subsecuente, secretario di Seguridad, Omar Garcia Harfuch a bisa.

Harfuch a agrega cu un guardia di prison, un miembro di oficina di fiscal estatal y 30 persona sospecha di ta miembro di organizacion criminal di Oseguera tambe a resulta morto.

Oseguera tabatin un recompensa di \$15 miyon na Merca pa su captura.

Ocho combatiente sospecha di ta miembro di cartel a muri den e operacion di forsanan special pa captura Oseguera y tres soldad a resulta herida,



secretario di Defensa, Ricardo Trevilla a bisa.

Residentenan cu miedo a sconde, y turista a refugia den nan hotel y resort mientras miembronan di e cartel tabata den riot.

Mientras cu presidente Mericano, Donald Trump ainda mester a responde publicamente na eliminacion di Oseguera, el a post brevemente riba su plataforma Truth Social: "Mexico mester aumenta su esfuerco contra Cartel y Droga!"

Maske e violencia a parce di ta baha, Mexico a keda den alerta eleva.

Gobierno a manda 2.500 tropa na Jalisco - un estado cu ta programa pa tene cuatro wega di futbol di Cup Mundial e berano aki.

Cayanan di capital di es-

tado Jalisco, Guadalajara, tabata casi bashi dialuna. Scol, tienda, botica y pompstation a permanece cera, tur evento involucrando multitud grandi a keda cancela y transporte publico suspendi.

E violencia a alcanza e ciudad resort di Puerto Vallarta, y a plama na estado bisiña Michoacan, unda cartel di Oseguera ta den guera contra un coalicion rival di grupo criminal.

'Shelter in place'

Advertencia di biahe for di Reino Uni, Canada y Merca a keda emiti despues di e suceso, cu Australia urgiendo su ciudadanonan pa "eherce un grado di cautela" dialuna trempa.

Washington a pidi ciudadanonan Mericano pa "shelter in place te proximo aviso." Decenas di vuelo Mericano y



Canades a keda cancela. Oseguera, 59, tabata considera e ultimo di e caponan di droga cu tabata actua segun e patronchi brutal di Joaquín "El Chapo" Guzmán, awo den prison, y Ismael "El Mayo" Zambada.

Cu su yiu homber Ruben "El Menchito" Oseguera González, 35, condena pa un hues federal na Washington na september, expertonan a adverti cu e "ausencia di sucesion directo" por resulta den un bashi di poder. "Esey ta habri porta pa realineamentonan violento dentro di e organizacion," David Mora, un experto na centro di analisis Crisis Group, a bisa AFP.

Sosten di inteligencia Mericano

Mexico a bisa cu ademá di su propio inteligencia militar, e operacion pa captura Oseguera a keda ehecuta cu "in-

formacion complementario" di autoridadnan Mericano.

Secretario di Prensa di Cas Blanco, Karoline Leavitt a bisa cu Washington "a duna sosten di inteligencia."

Presidente Sheinbaum sin embargo a insisti cu ningun forsa Mericano a participa den e accion di captura.

Dos sospechoso miembro di cartel a keda aresta y un variedad di arma confisca durante e operacion, incluyendo rocket launcher capaz di baha avion y destrui vehiculo arma, segun ehercito a bisa.

Oseguera tabata un miembro fundador di CJNG, cu a keda forma na 2009 y a crece den un di e cartelnan di droga mas violento na Mexico, dilanti di cartel di Sinaloa.

Washington a clasifica CJNG como un organizacion terrorista y ta acusa nan di manda cocaína, heroína, metanfetamina y fentanilo na Merca.

Secretario di Estado interino, Christopher Landau a elogia e operacion y a yama Oseguera "un di e caponan di droga mas despiada y sangriento."

E accion a yega memey di presion di Trump pa Mexico baha e fluho di droga yegando Merca.

Trump a menasa repetidamente cu impone tarifa riba exportacion Mericano, argumentando cu Sheinbaum no a haci suficiente pa combati trafico di droga.

Colombia: ELN ta bisa cu ta bay baha arma durante eleccion

(AFP) - E grupo di guerrilla mas grandi na Colombia dialuna a anuncia un alto-al-fuego unilateral durante proximo eleccion, memey di un aumento den violencia politico incluyendo atake, secuestro y menasa contra candidato y lider.

E pais ta bay eligi miembronan nobo di Congreso dia 8 di maart, y un sucesor di presidente isquierdista Gustavo Petro dia 31 di mei.

Ehercito di Liberacion Nacional (ELN) tipicamente ta duna ordo pa tregua temporal

durante periodonan di eleccion y dianan festivo mayor. Ostensiblemente un forsa isquierdista insurgente, e 6mil miembro di ELN tambe ta entre e organisacionnan mas poderoso pa traficacion di droga na Latino America.

Administracion di Petro a bandona esfuersonan fracasa pa negocia paz cu ELN, y expertonan ta bisa cu e guerrilla a bira mas fuerte recientemente, danki na entrada di cocaína.

Den un rapport dialuna tocante clima di seguridad na Colombia, oficina di Om-

budsman a bisa cu tabatin 457 menasa di morto contra lidernan civil y politico durante periodo di pre-eleccion. "Ta hopi preocupante, y ta cla cu e situacion ta deteriorando," Miroslav Jenca, un representante special di UN pa Colombia, a bisa AFP tocante e rapport.

E rapport a cita ELN, Clan del Golfo - e cartel di droga principal di Colombia - y fraccionnan disidente di e awo-defunto grupo guerrillero FARC como un "fuent di menasa" contra eleccion liber. Asesinato aña pasa di candi-

dato presidencial conservador, Miguel Uribe a genera miedo di un regreso na e violencia di añanan 1980 y 1990,

tempo cu cartel di cocaína y varios grupo arma a terrorisa Colombia, y asesinato politico tabata comun.



Panama ta tuma control di wafnan di canal for di CK Hutchison

(AFP) – **Autoridadnan marítimo Panameño a tuma control dialuna di dos waf di Canal di Panama for di CK Hutchison despues cu e concesion di e conglomerado basa na Hong Kong a keda anula despues di presion for di Merca.**

“Autoridad Marítimo di Panama a tuma posesion di su wafnan y a garantisa e continuidad di operacion,” un oficial a bisa despues cu Corte Supremo Panameño a anula e contractnan di Hutchison pa opera e wafnan.

E veredicto di corte tabata e movida legal mas recien pa ricochet door di e via inter-oceanico, cu ta maneha como 40 por ciento di trafico di container Mericano t 5 por ciento di comercio mundial.

E pais Centro Americano ta involucra den tension mas amplio entre Washington y Beijing, cu presidente Mericano, Donald Trump alegando sin duna evidencia, aña cu China efectivamente ta maneha e canal.



Panama semper a nenga cu tin control Chines riba e via marítimo di 80 km, cual ta ser usa principalmente pa Merca y China.

Asina mes, na januari e corte supremo di e pais a declara como “inconstitucional” e contract cu a permiti Hutchison pa maneha e wafnan di Balboa riba Pacifico y Cristobal riba e banda Atlantico desde 1997.

Hutchison a pidi gobierno Panameño pa dreña negociacion pa permitie sigui opera e

dos terminal, y riba diabierna un vocero di e compania a bisa cu combersacion asina ta necesario pa “evita caos.”

Publicacion di e veredicto den e gazette oficial dialuna efectivamente a finalisa e proceso legal, y e decision no ta suheto na apelacion. E medida a keda formalisa pa un decreto despues di publicacion den e gazette.

“Autoridad Marítimo Panameño a tuma posesion di su wafnan y ta garantisa continuidad di operacion,” director di puerto, Max Florez a

bisa reporteronan. El a bisa cu awo ta cuminsa un periodo di transicion di 18 luna, cu e wafnan opera pa otro dos compania prome cu otorga contract bao di un destaho internacional nobo.

APM Terminals, subsidiario di e grupo Danes, Maersk, ta bay opera e waf di Balboa, y Terminal Investment Limited, propiedad di gigante di logistica MSC, ta bay opera e waf di Cristobal.

Minister di Labor, Jackeline Munoz a sigura cu no ta bay

tin retiro di personal na e dos terminal, cu ta emplea alrededor di 1.200 persona.

Siguiendo veredicto di e corte na januari, Autoridad Marítimo Panameño a bisa cu un division di Grupo Maersk lo tuma over operacion di e facilidadnan temporalmente.

Siman pasa, Hutchison a adverti di posible accion legal contra Maersk y otronan tocante anulacion di su contract.

Y e compania di Hong Kong a bisa cu lo reta e decision di Panama dilanti Camara Internacional di Comercio.

Embahador Mericano na Panama, Kevin Cabrera a defende e accionnan di autoridadnan Panameño, bisando cu nan tin derecho “pa laga nan sistema hudicial haci nan propio decision.”

E Canal di Panama a keda construi pa Merca, cu a oper’e pa un siglo prome cu cede control na Panama na 1999.

Venezuela cu peticion na UN pa liberacion di Maduro

(AFP) – **Minister di Exterior Venezolano, Yvan Gil Pinto dialuna a exige e liberacion inmediato di Nicolas Maduro, kende a ser baha como presidente dia 3 di januari den un operacion Militar Mericano.**

Maduro, kende autocraticamente a goberna Venezuela entre maart di 2013 y su captura pa forsan Mericano, ta den custodia na New York hunto cu su esposa, wardando na huicio.

Maduro, 63, a declara inocencia pa cargonan di trafica-cion di droga y a declara cu e ta un “prisionero di guerra.”

Dirigiendo palabra na Consejo di Derecho Humano di Nacionnan Uni na Geneva, Gil a exige “e liberacion inmediato” di Maduro y su esposa, Cilia Flores for di Merca.

“Dia 3 di januari 2026 a marca un punto di gravedad extremo,” Gil a bisa e cuerpo maximo di derecho na UN, agregando cu e “accion militar ilegal” di forsan Mericano a laga mas di 100 persona morto.

“A pesar di e accion aki, ehecuta den contexto di asime-

tria tecnologico y militar profundo entre nos pais y e poder nuclear di Merca... nos a scoge pa habri un canal diplomatico pa resolve nos diferencianan cu e pais ey,” el a bisa.

Meta di ‘reconciliacion’

E diplomatico top di Venezuela a insisti cu su pais tabata “trahando den direccion di un proceso di reconoce heridanan pasado, pordon y reconciliacion,” refiriendo na un ley nobo di amnistia cu a pasa.

Legislatura di e pais unanimamente a adopta e ley historico diahuebs ultimo, y lider interino, Delcy Rodriguez su ruman, presidente di parlamento Jorge Rodriguez a bisa cu 1.500 persona a aplica pa e amnistia, cu ta cubri un variedad di cargo usa pa cera disidentenan durante 27 aña di gobierno socialista duro.

Alrededor di 600 prisionero politico ta keda cera na henter e pais, segun Foro Penal – un NGO dedica na defensa di prisionero politico – a pesar cu alrededor di 500 persona a keda libera desde januari.

Mas di 200 prisionero na

prison Rodeo I, un facilidad como 40km oriente di Caracas, a bay den welga di hamber durante weekend pa exige nan libertad.

Diadomingo, Comité Internacional di Cruz Cora a haya acceso na varios prison, incluyendo Rodeo I pa prome biaha.

Acercamento cu Occidente

Figuranan di oposicion a critica e legislacion nobo, cu ta parece di exclui algun ofensa anteriormente usa contra oponentenan politico di Maduro. Tampoco ta inclui ofensa militar, manera intento di golpi di estado.

E ley di amnistia a yuda accelera un acercamento den e lasonan di Venezuela cu Occidente. Diplomatico top di Union Europeo, Kaja Kallas a bisa dialuna cu e lo propone elimina sancion di EU riba presidente Rodriguez.

Separa, oficina di derecho di UN a bisa cu ta den combersacion cu Caracas pa habri back su mision na Venezuela. Su personal a keda expulsado na februario 2024.

Den otro señal di un ruptura



cu pasado, dialuna Rodriguez a duna retiro for di su gabinete na casa di un comerciante acusa di sirbi como frente di Maduro den programan di corrupcion.

Alex Saab ta acusa na Merca di labamento di placa, pero a bolbe Venezuela na 2024

como parti di un intercambio di prisionero pa asumi e rol di minister di Industria. Rodriguez a retir’e di su posicion na januari. Dialuna, el a duna retiro na esposa di Saab, Camilla Fabri, kende tabata fungi como minister vice-minister pa Comunicacion Internacional.

Reina di Reino Uni Camilla ta reuni cu Pelicot

(AFP) - E Reina di Reino Uni, Reina Camilla, a reuni cu sobreviviente di violacion, Gisele Pelicot, segun Buckingham Palace a informa via un comunicado y a bis'e cu el a keda "sin palabra" cu Pelicot su memoir.

"Awe 'tardi, su mahestad a ricibi Madame Gisele Pelicot na Clarence House," e declaracion breve a informa, referiendo na e muhe cu a bira un simbolo den e lucha global contra violencia sexual.

E dos muhenanan a reuni pa larededor di 30 minuut y Camilla a bisa Pelicot cu el a lesa su memoir "den e ultimo 2 dia. Mi no por a lag'e los," e agencia Press Association a reporta cu el a bisa. "Mi a conoce asina hopi sobreviviente di violacion y agresion sexual cu nunca mi a pensa cu tin mas cu lo sorprendem'i, pero mi a keda den shock cu bo caso - el a laga'mi sin palabra," e Reina a agrega.



Camilla tin hopi tempo ta campaña contra violencia sexual y violencia domestico, papiando tocante e problema den varios ocasion. Aña pasa, el a skirbi un carta priva pa Pelicot, di 73 aña, ken su ex casa a droga y a viola hunto cu desconocidonan cu el a conoce online pa un decada. "E tabata tremendamente afecta pa Madame Pelicot su caso na Francia y e Madame su dignidad y curashi extraordinario," fuente di e palacio a bisa e revista Newsweek. "Manera el a bisa, dicon e mester sinti

manera un victima y sconde cu berguensa?"

Pelicot, ken a rechasa su derecho di keda anonimo durante e huicio den 2024 di su ex casa y decenas di desconoci cu a abusa di su persona sexualmente mientras e tabata inconsciente, a bisa cu e tabata "emociona" di a ricibi e Reina su cara.

Pelicot su ex casa, Dominique, a para huicio band di 50 otro hende homber y a keda sentencia cu 20 aña pa



violacion grave den e ciudad di Avignon den december di 2024. Decenas di hende homber cu a bishita e cas di e famia pa viola Gisele Pelicot, ken tabata inconsciente a causa di e droga, a ricibi entre 3 pa 15 aña di prison.

Pelicot ta na Reino Uni pa promove su buki, titula "A Hymn to Life," unda e ta cubri henter e matrimonio di 50 aña.

El a conta AFP anteriormente e luna aki: "mi ta miho.

Despues di e huicio mi a tuma control di mi bida y awe mi ta purbando di reconstrui despues di e destruccion. A pesar di tur esaki, hasta den e periodonan mas scur, mi semper a busca e momentonan di felicidad; mi ta emocion pa e futuro, pa yega felicidad. Mi sa cu esaki por sorprende algun cu ta anticipa di wak mi completamente destrui, pero mi ta determina pa keda para y cu dignidad."

Yiu homber di difunto Rob Reiner ta declara su mes inocente

(AFP) - Yiu homber di e director di pelicula Mericano, Rob Reiner, a declara su mes inocente na e atake fatal contra ambos di su mayornan ora cu el a presenta den corte di Los Angeles dialuna.

Nick Reiner ta enfrente dos cargo di asesinato di prome grado pa e dobbel asesinato cu a manda ola di shock na Hollywood dianoan prome cu pasco.

E homber di 32 aña a keda aresta dia 14 di december despues cu a haya e curpa di su tata y su mama, fotografa Michele Singer Reiner, na nan cas na Los Angeles.

Fiscalnan a bisa cu Rob Reiner, di 79 aña - ken tabatin hit manera "When Harry Met Sally" y "A Few Good Men" - y su casa di 70 aña, a ser staca fatalmente.

Nick Reiner, ken tin un historia di adiccion, a presenta den corte unda el a ser bisa formalmente ki cargonan e ta enfrente y unda a splica su derechonan. Un declaracion di "inocente" ta comun na e etapa aki, sin importa kico defensa haci despues. Reiner, ken ta bao aresto y no a ricibi libertad bao fianza, a ricibi orden pa regresa corte dia 29 di april.



Un sesion unda ta informa di e acusacionnan usualmente ta tuma luga hopi mas trempan, sinembargo Reiner no por a presenta na e prome sesion cu tabatin den schedule. Otro audiencia luna pasa a keda para despues cu corte a haya sa cu Alan Jackson no ta representando Reiner mas.

Hues a nombra un abogado di oficina publico di defensor na su luga.

Jackson, un abogado di alto perfil cu anteriormente a representa clientenan di Hollywood manera Harvey Weinstein y Kevin Spacey, a conta reportero cu "legalmente y eticamente" e no por splica dicon el a retira. "Circun-

stancianan fuera di nos control pero mas importante, circunstancianan fuera di Nick su control a dicta cu, lastimamente, ta imposible pa nos sigui nos representacion di Nick," el a comenta.

Jackson a bisa cu e y su ekipo ta keda comprometi na Reiner su miho interes y tin fe cu e proceso legal "lo revela e hechonan berdadero di e circunstancianan cu ta rondona e caso. Nos a investiga e caso aki for di ariba te abao, dilanti te patras. Loke nos a haya sa ta cu segun e leynan di e estado aki, segun ley na California, Nick Reiner no ta culpable di asesinato."

Si condena pa e cargo, Reiner

ta enfrente cadena perpetua den prison sin posibilidad di libertad of ta enfrente e pena di morto, aunke California no ta ehecuta e castigo aki rutinariamente.

Los Angeles County District Attorney Nathan Hochman a conta reporteroenan fuera di corte cu su oficina lo examina e circunstancianan pa cu e asesinato prome cu tuma un decesion riba si lo pidi e pena di morto si Reiner keda condena.

Reiner, ken a biba den un cas riba propiedad di su mayornan, tabata na un fiesta na cas di e comediante Conan O'Brien dia 13 di december cu su mayornan, unda algun di nan aparentemente a mir'e ta comporta di manera strano. Citando un fuente, The

New York Times, a bisa cu e pareha mester a reuni cu ex presidente Barack Obama y su casa Michelle diadomingo anochi y aparentemente a contrata un masashi na cas pa e dia ey. E corant a bisa cu ora ningun hende a habri porta, e terapeuta a tuma contacto cu e pareha su yiu muhe, Romy Reiner.

Ora el a yega cu un amistad, el a descubri e curpa di su tata y a yama servicionan di emergencia. Paramediconan a bisa cu su mama su curpa tambe ta na e propiedad.

Polis a aresta Nick Reiner varios kiloemter leu di e escena di e crimen e anochi ey. Rob Reiner, e yiu homber di comediante legendario, Carl Reiner, a cuminsa su carera cu actuacion.



Minister ta sali for di festival di cine despues di acusacionnan di rol Aleman den “genocidio” di Gaza

(AFP)—Un minister Aleman a sali for di e ceremonia di premio di e Berlin Film Festival despues cu un director a acusa Alemania di complicidad den e “genocidio” cometi door di Israel den Gaza.

Minister di Ambiente Social Democratico, Carsten Schneider, a sali for di e ceremonia diasabra anochi pa via di remarkenan “inacceptable,” su ministerio a bisa.

Director Sirio-Palestino Abdallah Al-Khatib, ken a gana e premio pa Miho Premio di Prome Pelicula cu su pelicula “Chronicles from the Siege”, a bisa den su discurso cu gobierno Aleman “ta partnernan den e genocidio na Gaza cometi door di Israel. Mi ta kere bo ta inteligente suficiente pa reconoce e berdad aki.”

Schneider tabata e unico miembro di gobierno Aleman asistiendo e ceremonia aunke e no tabata ey pa represent’e,



su ministerio a conta AFP. Minister di cultura, ken AFP a tuma contacto cune pa haya sa e motibo di su ausencia di su minister Wolfram Weimer, no a responde inmediatamente.

Un miembro importante di e partido conservativo di Canciyer Friedrich Merz, Alecander Hoffmann, a denuncia loka el a bisa tabata “scenarionan repugnante” di “antisemitismo” durante e

ceremonia.

“E acusacionnan di genocidio, e declaracionnan antisemitico, y e menasanan contra Alemania na Berlinale ta absolutamente inacceptable,”

Hoffmann, hefe di Christian Social Union, e partido Bavariano alia cu e partido di Merz, a conta Bundestag.

Alcalde CDU di Berlin Kai Wagner a conta e corant Bild cu “e demostracion habri di odio pa Israel ta den contradiccion directo cu kico e festival aki ta representa.”

E contexto di e conflicto den Medio Oriente a resulta den un di 76 edicion tenso di e festival.

Mas cu 80 profesional den mundo di cinema a critica e “silencia” di Berlinale riba e guerra na Gaza den un carta habri, acusando e festival di censura artistanan “cu ta rechasa e genocidio” nan ta kere Israel a comete na Gaza.

Escritor Indio Arundhati Roy a retiro for di e festival despues cu presidente di hurado Wim Wenders a bisa cu cinema mester “keda afo di politica” ora a puntr’e tocante Gaza.

Campañador di Tourette’s “bergonsa” despues di a grita palabra ofensivo racial durante BAFTA

(AFP)—John Davidson, campañador di sindroma Tourette’s ken a inspira un pelicula cu a gana e premio BAFTA, a bisa dialuna cu e tabata “profundamente bergonsa” despues di grita un palabra ofensivo racial durante e ceremonia na Londres, cual el a bisa tabata un “tic involuntario.”

Por a tend’e grita e palabra ofensivo N— mientras actornan di pelicula “Sinner”, Delroy Lindo y Michael B Jordan, ken ambos ta Afroamericano, a presenta un premio pa efecto di visualisacion special durante e ceremonia diadomingo anochi.

“Mi ta, y mi semper tabata bergonsa si un hende considera mi tican involuntario como intencional of algo cu ta carga significancia,” Davidson, ken ta e inspiracion tras di e pelicula “I Swear,” a bisa den un declaracion na e agencia noticiero PA.

El a agrega cu e “a scoge” pa sali for di e auditorio durante e ceremonia “como cu mi tabata consciente di e inco-

modidad cu mi tican tabata causando.” “Mi a pasa mi bida ta purbando di sostene y podera e comunidad di Tourette’s y pa siña empatia, cariño y comprension for di otronan y mi lo keda haci esaki,” el a bisa.

Actor Britanico Robert Aramayo a triunfa riba streanan estableci Timothee Chalamet y Leonardo DiCaprio pa gana e premio di mihor actor pa su presentacion di Davidson, di ken su bida den un ciudad

chikito na Escocia a ser cambia pa e condicion. E premionan di cine Britanico mientras tanto a pidi despensa pa e “lenguahe hopi ofensivo cu ta carga trauma incomparable y dolor pa hopi,” despues cu un video di e grito a bay viral y a causa critica fuerte online.

“Sindroma Tourette ta causa tican verbal involuntario, unda e individuo no tin control riba dje,” British Academy of Film and Television

Arts a bisa.

“Michael B. Jordan y Delroy Lindo tabata riba escenario e momento ey, y nos ta ofrece nos disculpa profundo na nan, y na esnan impacta.”

Despensa di BBC

Actor Alan Cumming, e anfitrión di e ceremonia, a pidi despensa pa e lenguahe cu espadornan por a tende durante e transmision. BBC tambe a pidi disculpa pa no edita e palabra ofensivo for di

su transmision, cual a ser presenta cu un retraso di dos ora diadomingo anochi.

A edita esaki afo den e version riba e servicio di streaming di BBC dialuna mainta. “Nos ta ofrece nos disculpa pa no edita esaki prome cu e transmision y awor nos lo kit’e for di e version riba BBC iPlayer,” e organizacion noticiero a bisa.

Un vocero pa e caridad Tourettes Action a bisa cu e ta compronde “profundamente” e ofensa y daño causa pa palabranan racial. Pero nan a bisa cu tabata “critico pa publica compronde e berdad fundamental tocante e sindroma di Tourette—tican ta involuntario. Nan no ta refleha e creencia, intencion of caracter di e persona.”

“Hende cu Tourette’s por bisa palabra of frasenan cu nan no ta kere den dje, no ta promove y ta sinti hopi berguensa di dje despues,” e vocero a agrega.

E caridad a agrega cu e tabata “increiblemente orguyoso” di Davidson y otronan involu den e pelicula.



Corte Argentino ta permiti ehecutivo di futbol sali di e pais a pesar di investigacion riba impuesto

(AFP)—Claudio Tapia, e presidente di e Asociacion di Futbol Argentino (AFA), a haya permiso pa sali di e pais den un huicio di corte publica dialuna, cinco dia despues cu el a haya prohibicion di biahe como parti di un investigacion riba fraude di impuesto.

“E existencia di un investigacion criminal no ta contribui suficientemente na un base pa preveni e acusado di biaha,” e huicio ta bisa. Autoridadnan di impuesto ta investigando si AFA a retene contribucionnan di pension ilegalmente for di hungador y empleadonan y a fracasa pa

paga impuesto sumando te aproximadamente 13,8 milyon dollar entre maart 2024 y september 2025.

Tapia a pidi permiso pa biaha pa asina asisti e evento di e Federacion di futbol di Colombia na Barranquilla, sigui pa un reunion di directiva di e federacion di futbol Sur Africano (Conmebol) na Rio de Janeiro.

Tapia a ser convoca pa aparece den corte dia 5 di maart, hunto cu e tesorero di AFA y tres otro oficial. AFA tambe ta bao investigacion pa supuesto labamento di placa, cual a resulta den un inval na december, hunto cu varios club

di prome division manera Racing, Independiente y San Lorenzo.

AFA ta bisa cu e ta victima di un “campana di difamacion” memey di un disputa cu un empresario tocante e organizacion di partidonan internacional amigable na Argentina.

AFA ta bisa cu e gobierno derechista di presidente Javier Milei ta envolvi. Milei ta faborece transforma clubnan di futbol, cual ta asociacionnan sin fin di lucro, den companianan deportivo den comercio publico.

Reglanan di AFA no ta permiti esaki.



UEFA ta suspende Prestianni despues di supuesto abuso racista

(AFP)—UEFA a suspende dialuna mediocampista Gianluca Prestianni di e segunda tanda di Benfica su campana di Champions League contra Real Madrid e siman aki despues cu a acus’e di abuso racial contra Vinicius Junior.

E cuerpo disciplinario di UEFA, ken ainda ta investigando e supuesto incidente for di e prome tanda siman pasa, a bisa den un declaracion cu nan “a dicidi pa suspende Sr. Gianluca Prestianni pa e proximo partido di competencia di club pa cual e lo mester ta eligible.”



Prestianni lo pa e motibo aki no aparece pa Benfica diaranson na e stadion Santiago Bernabeu pa cambia e deficit di 1-0 y alcanza e ultimo 16.

Hungador Brasileiro internacional Vinicius a anota e gol cu ta dividi e equiponan y a reporta e supuesto abuso racial na e referee despues di

su celebracion, unda e weg a stop pa casi 10 minuut.

UEFA a bisa cu e suspension provisional di un weg a ta “sin prehuicio na cualkier veredicto cu e organismonan disciplinario di UEFA por haci despues di e conclusion di e investigacion andante.”

Si UEFA haya cu Prestianni, 20, a abusa racialmente di Vinicius e lo haya prohibicion di minimo 10 partido.

Prestianni, ken a argumenta cu Vinicius mientras cubriendo su boca cu su camisa, ta insisti cu e no a abusa di e

delantero di Real Madrid.

Defensa di Real Madrid Trent Alexander-Arnold a bisa cu e incidente tabata un “desgracia pa futbol,” mientras delantero Kylian Mbappe a bisa cu Prestianni “no ta merece hunga den Champions League mas.”

Entrenador di Benfica Jose Mourinho, ken tambe ta suspendi pa e segundo tanda, a critica Vinicius pa su celebracion di gol y a bisa cu su club no por ta racista pasobra nan miho icono, Eusebio, tabata color scur.

Vonn ta bisa cu lesion Olimpico por a resulta den amputacion

(AFP)—Atleta di ski Mericano Lindsey Vonn, ken a sufri un caida horroso den e careda descendente Olimpico na Cortina, a gradici e dokter cu a salba su pia.

Vonn a publica un video riba Instagram incluyendo imagenan grafico di su lesion y un video di operacion, bisando cu el a sali for di hospital. Vonn a sufri di un set di fractura den pia durante e caida dia 8 di februari.

“Tur cos tabata kibra pida pida,” el a bisa.

El a haya un serie di operacion na Italia prome cu el a regresa Merca unda Tom Hackett, e ciruhano ortopedico cu ta traha cu e equipo di ski, a conduci un operacion

di seis ora y “a salba mi pia di ser amputa.”

El a bisa, e lesion a causa “sindrome di compartimento” cual a pone su pia den riesgo.

E campeon di careda descendente Olimpico na 2010 a sali for di pension aña pasa despues di casi seis aña sin participa y a haya forma impresionante durante e temporada aki cu siete posicion riba podium den ocho careda, incluyendo dos victoria, pa Copa Mundial.

Un caida na januari a lag’e cu un ligamento destrui den su rudia banda robes, pero asina mes el a bay e Olimpiada. “Ta hopi duro y no ta e manera cu mi kier a termina na e Olimpiada,” el a bisa, cu lagrima den wowo. “Pero ta

inspirante pa mira mi companeronan.”

“Mi no ta arepentí,” el a agrega. “Mi a traha asina duro pa bay back y e aña aki tabata bale la pena.”

“Mi tabata den hospital un poco mas largo cu mi a spera, pasobra mi hemoglobina tabata abao pa via di e perdida di sanger y mi tabata lucha cu dolor.”

Vonn, ken tin 84 victoria di careda na nivel di Copa Mundial, tabata spera pa gana su di cuatro medaya Olimpico. “Mi ta suficiente bon awor pa bay un hotel. E no ta cas ainda, pero e ta un paso pa dilanti!” el a skirbi, pero tambe a agrega cu e no por cana ainda.

“E ta bay dura hopi. Mi ta

den rolstoel awor pasobra mi a kibra mi enkel tambe.

Awor mi lo enfoca riba rehabilitacion y purba progresar di

rolstoel pa kruk dentro di par siman. E lo tuma casi un aña pa tur weso cura.”



Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com

Canada ta convoca OpenAI pa falta di reporta tirador

(AFP) - Canada a convoca liderazgo di alto nivel OpenAI pa Ottawa, pa asina e splica e compania su decision di no reporta actividad sospechoso online di un individuo cu despues a asesina 8 persona e luna aki.

OpenAI a confirma cu den juni di 2025 su esfuersonan di deteccion di abuso a identifica un cuenta di ChatGPT conecta na Jesse van Rootselaar, un muhe transgenero di 18 aña cu a asesina su mama, ruman homber y 6 persona na un scol na Tumbler Ridge, British Columbia, dia 10 di februari.

E compania a conta AFP cu e cuenta a keda identifica via un proceso investigativo cu ta busca uso relaciona cu actividad violento.

Aunke a suspende e cuenta e



luna ey, e compania no a informa polis di Canada e tempo aki. E decision ey ta “preocupante,” Canada su minister di Inteligencia Artificial Evan Solomon a conta reportero dialuna na Ottawa.

“Mi a convoca e ekipo di seguridad di OpenAI na Merca pa bin Ottawa,” Solomon a bisa. “Nan lo bini aki mañan,

y nos lo tin un reunion pa ricibi splicacion tocante nan protocol di seguridad,” el a agrega.

OpenAI a bisa cu e ta usa un bara hopi halto ora di dicidi si lo involucra autoridadnan of no despues di identifica un cuenta sospechoso. Pa loke ta trata Van Rootselaar, el a dicidi di no informa polis pa

motibo cu su uso di ChatGPT no a señala na plan creible of inminente di un atake. “Nos pensamentonan ta cu tur esnan afecta pa e tragedia na Tumbler Ridge,” e compania a bisa den un declaracion siman pasa.

“Nos a acerca proactivamente na Royal Canadian Mounted Police cu informacion tocante e individuo y nan uso di ChatGPT, y nos lo sigui sostene nan investigacion,” el a agrega.

Solomon a bisa cu e “inmediatamente” a tuma contacto cu OpenAI ora cu prome el a lesa e reportahenan den media cu e compania “no a contacta autoridadnan na tempo.”

E no oa specifica ki accion of legislacion nobo Ottawa por considera pa regula e uso di inteligencia artificial cu bay

dilanti, pero a bisa cu “tur opcion ta riba mesa.”

Canada a keda den shock cu e tragedia na Tumbler Ridge, un pueblo di minamento chikito cu a construi 4 decada atras. Van Rootselaar su victimanan na e scol ta inclui 5 mucha y 1 docente. E tirador a fayece pa un tiro cu el a los na su mes, segun polis.

E tabatin un historia di problemanan cu su salud mental, y RCMP anteriormente a haci un bishita na su cas.

A diferencia di Merca, Canada tin leynan estricto pa arma di candela y tiro masal ta extremadamente poco comun.

E asesinatnan na Tumbler Ridge ta entre e pio incidentenan di violencia den historia Canadense.

Gigante di AI Mericano ta acusa rivalnan Chines di robo di data masal

(AFP) - Compania di inteligencia artificial Mericano Anthropic a acusa dialuna, cu el a descubri campaña di 3 firma di AI Chines pa ilicitamente extrae capacidnan di su chatbot Claude, den loke el a describi un robo di propiedad intelectual industrial.

Anthropic a bisa DeepSeek, Moonshot AI y MiniMax a usa tecnica conoci como “distillation” - usando un sistema di AI mas poderoso pa rapidamente impulsa e funcionamiento di uno cu menos capacidad.

“E campananan aki ta creciendo den intensidad y sofisticacion,” e compania a bisa den un declaracion. “E

bentana pa tuma accion no ta mucho hanchu.”


Distillation ta un practica comun dentro di desaroyo di AI, hopi biaha usa pa companianan pa crea nan version mas chikito, menos costoso di nan propio model. E practica a hala atencion den noticia un aña atras ora cu e publicacion di un model di AI cu menos costo pa generacion di DeepSeek a duna mesun resultado cu ChatGPT y otro chatbot Mericano top, cambiando e impresion di Merca su posicion dominante den e sector sensitivo.

Anthropic a bisa cu e companianan a logra esaki via aproximadamente 16 milyon intercambio cu su model Claude y 24.000 cuenta falso.

Esaki a permiti 3 laboratorio saca capacidnan cu nan no a desaroya independientemente, pa un costo hopi mas abao - den haci esaki a evadi e controlnan di exportacion riba tecnologia Mericano poderoso cu tin intencion di preserva e posicion dominante di Merca den AI.

E compania a argumenta cu e practica ta posee riesgonan na seguridad nacional, bisando cu modelnan construi via distillation ilicito ta tiki probable di tin e proteccionnan diseña pa preveni mal uso - manera restriccion riba yuda desaroya arma biologico of atakenan cibernetico.

Anthropic su rival OpenAI, creador di ChatGPT, a haci acusacionnan similar na legisladornan Mericano e luna aki, bisando cu companianan Chines ta usando e tecnica den medio di “esfuerzo andando pa usa e capacidnan desaroya pa OpenAI gratuitamente y otro laboratorionan Mericano.”



Anthropic a bisa cu MiniMax a mancha e operacion mas grandi, generando mas di 13 milyon intercambio.

Cada campaña a concentra di manera pisa riba codigo, rasonamento di agente y uso di herment - areanan unda Claude ta considera un lider.

Pa evita Anthropic su pro-

hibicion riba acceso comercial for di China, e laboratorionan a dirigi e trafico via servicionan cu ta mancha e gran cantidad di red di cuentanan fraudulento.

Anthropic a haci yamado pa un respuesta coordina na nivel industrial y gubernamental pa atende loke el a bisa ningun compania mester contrasta su so.

FIND US ON
BONDIA
ARUBA
www.bondia.com
ALSO AVAILABLE ON
f i d x

Ehecutivo di YouTube ta bisa cu meta tabata balor di espectador, no adiccion



(AFP)—Un huicio historico tocante adiccion di social media a reanuda dialuna cu un ehecutivo di YouTube insistiendo cu meta di e compania di Google tabata pa duna hende balor, no haci nan adicto na ‘binge-viewing’ dañino.

Vice-presidente di ingenieria di YouTube Cristos Goodrow a ser presiona pa defende e asina yama “meta grandi y

ambicioso” cu e compania a pone mas cu un decada pasa pa aumenta tempo di espectador te mas cu mil miyon ora pa dia pa 2016.

Manera el a haci siman pasa ora hefe ehecutivo di Meta Mark Zuckerberg a testifica den mesun corte na Los Angeles, abogado di demandante Mark Lanier a bisa huesnan cu compensacion di Goodrow a subi hunto cu prijs di accion di su compa-

nia, significando cu e personalmente a gana di aumenta participacion di usuario.

“YouTube no ta diseña pa maximisa tempo,” Goodrow a contesta, mientras cu a mostra documento interno di compania cu ta indica cu participacion di espectador tabata prioridad pa rendimiento di e plataforma.

“E ta diseña pa duna hende e maximo balor...”

Como contra-argument, Lanier a pidi Goodrow detaya adiccion di funcionnan manera auto-play pa video y anuncio, y un version di YouTube crea especificamente pa mucha.

Abogado a bisa cu e esfuersonan ey a atrae usuaronan na un “treadmill cu verificacion continuo” pa contenido nobo.

E tambe a referi na documenton interno di YouTube cu referencia na investigacion externo cu a haya efecto dañino di pasa demasiado tempo mirando video.

E huicio ta programa pa dura te fin di maart, ora huesnan lo dicidi si Meta y YouTube ta carga responsabilidad pa problemanan di salud mental sufri pa Kaley G.M., un residente di California di 20 aña cu tabata usuario fuerte di social media desde infancia.

Kaley G.M. a cuminsa usa YouTube na edad di seis aña, Instagram na nueve, y despues TikTok y Snapchat.

E ta anticipa pa testifica e siman aki—talbes pa diahuebs caba, segun su abogado.

Zuckerberg a testifica siman pasa cu el a lamenta e progreso lento di Meta pa identifica usuaronan menor di

edad riba Instagram, mientras equiponan legal di e demandante a critica e compania fuertemente pa apunta deliberadamente riba mucha.

E huicio aki ta e prome den un serie di demanda presenta pa famianan Mericano contra plataforman di social media y lo determina si Google y Meta a diseña nan plataforma deliberadamente pa encuraha uso compulsivo entre hobenan.

E caso aki ta anticipa pa establece un standard pa resolve miles di demanda cu ta culpa social media pa alimenta un epidemia di depresion, ansiedad, trastorno alimentario y suicidio.

TikTok y Snapchat, tambe nombra den e demanda, a logra un acuerdo cu demandantenan prome cu e huicio a cuminsa.

Hefe di NASA ta descarta lansamento di mision pa e luna na maart

(AFP) - Hefe di NASA, Jared Isaacman, a descarta diasabra un lansamento den maart pa Artemis 2, e prome mision cu tripulacion destina pa luna den mas di 50 aña, citando problemanan tecnico.

Empleadonan a detecta un problema cu e fluho di helium na e racket masivo SLS cu lo “Saca e bentana di maart como fecha di lansamento fuera di consideracion,” Isaacman a bisa den un publicacion riba e red social X.

“Mi ta compronde cu hende ta desapunta pa e desaroyo aki. E defraudacion aki ta sinti mas pa e ekipo na NASA, ken ta trahando incansablemente pa prepara pa e gran aventura aki,” Isaacman a bisa.

“Durante añanan 1960, ora cu NASA a logra loke mayoria tabata pensa ta imposible, y loke nunca a ripiti desde e tempo aki, tabatin varios desafio.”

E racket SLS y nave espacial Orion lo bay back den e linea di Vehicle Assembly Building na Kennedy Space Center na Florida pa investiga e problemanan tecnico y haci cualkier reparacion necesario, Isaacman a bisa.

Un reportahe completo lo sigui den e dianan binidero, el a agrega.

E mision altamente anticipa, Artemis 2, cu lo dura 10 dia, lo mira 3 Mericano y un Canades bula rond di planeta tera su satellite.

E ta un gran paso den direccion di hiba



Mericanonan pisa superficie di luna un biaha mas, un meta cu presidente Donald Trump a anuncia den su prome termino.

Riba diabierna, NASA a pone maart 6 como e fecha mas trempan di lansamento.

E agencia di espacio Mericano ta spera di pone ser humano back riba luna mientras China ta sigui cana cu su esfuersonan rival, stipulando 2030 como mas tardar pa su prome mision cu tripulacion.

China su mision Chang’e 7 ta anticipa di lanza den 2026 pa un exploracion

di luna su polo sur, y test di su nave espacial Mengzhou tambe den plan pa e aña aki.

NASA a sorprende varios fin di aña pasa ora cu el a bisa cu Artemis 2 por sucede den februari mes - un aceleracion cu Trump su administracion a splica como purba di gana China.

Sin embargo e programa a yena cu atraso.

Artemis su prome mision a tuma luga den november di 2022 despues cu a pospone esaki den varios ocasion y 2 intento di lansamento cu a fracasa.

Despues, problemanan tecnico den comienso di februari - cual a inclui un leak di hidrogeno - a corta un test pa e lansamento di Artemis 2. Esaki finalmente a keda completa anteriormente e siman aki.


E training aki a keda haci bao di condicionnan real cu tanki di racket completo y evaluacionnan tecnico - na Cape Canaveral, Florida, cu ingenieronan ta practica e maniobranan necesario pa ehecuta un lansamento real.

NASA ta spera cu luna por ser usa pa prepara pa misionnan futuro na mars.

Chauffeur a causa accidente y a core bay lagando hende herida

Diaranson anochi siman pasa a drenta informe di un accidente cu hende herida dilanti di Diamonds International, mesora a dirigi tanto polis como ambulance na e sitio.

compronde cu aki ta trata di un accidente hit & run unda un auto a bandona e sitio despues di a dal tras di e auto. Debi na e impacto e pasahero a resulta levemente herida. Na yegada di e ambu-



lance a atende e victima na e sitio mes. Polis a tuma informacion di e number di auto modelo y color. Polis a keda di busca e chauffeur cu a core bay

Chauffeur di pickup a sali dilanti auto na Montaña

Diadomingo mainta a drenta informe di un accidente banda di Huan Zhan Supermarket na Montana, mesora a dirigi un patruya na e sitio.

Na yegada di e patruya a bin compronde cu e chauffeur di e pick-up cu a sali dilanti di e auto cu tabatin preferencia. Afortunadamente ningun hende a resulta herida.



Polis a para auto cu a comete infraccion mainta tempran



Diadomingo mainta durante patruya polis a nota un auto cometiendo in-

fraccion den trafico.

Mesora polis a para e auto y a atende cu e chauffeur su

comportamento den trafico. Na final polis a dun'e e conocido "BOET".

Chauffeur di edad a perde control dal riba heavy equipment



Diasabra anochi a drenta informe di un accidente cu hende herida na Santa Cruz, mesora a dirigi tanto polis como ambulance. a bin compronde

cu ya caba ambulance tabata na e sitio pero e victima mes no kier a haya atencion ni pa bay hospital. Segun por a compronde e wiel di e Kia a

cay for di caminda y e chauffeur a bira e stuur. Diripiente e auto a perde control y a bay dal un heavy equipment machine cu tabata staciona banda di e caminda. E impacto tabata basta duro. Como cu e chauffeur tabata papia poco cos straño y no tabata corda a yama ambulance toch pa bin controla e victima.

Polis y ambulance a bay pa un accidente cu 3 persona herida na Sero Patrishi



Diasabra anochi a drenta informe di un accidente cu hende herida dilanti ex-7World na Sero Patrishi, mesora a dirigi tanto polis como ambulance na e sitio.

Na yegada di e patruya a bin compronde cu aki ta trata di un accidente unda cu e

chauffeur no a regula su velocidad ni a mantene distancia y a bay dal fuertemente tras di un auto cu 2 persona aden. Debi na e impacto tanto e chauffeur como e otro 2 persona a resulta herida. Na yegada di e 3 ambulancenan nan a atende nan y transporta nan pa hospital.

Opinion ta un seccion di **Bon Dia Aruba** specialmente pa brinda oportunidad na lectoran individual pa expone nan opinion. Contenido publica di ningun manera ta refleha opinion di **Bon Dia Aruba** y ta pa responsabilidad exclusivo di e organisacion/individuo cu ta ofrece esaki pa publicacion. **Bon Dia Aruba** ta reserva e derecho di no publica texto ofreci, si esaki segun e medio no ta cuadra cu e normanan di decencia cu nos ta mantene, pa evita contenido cu ta innecesariamente ofensivo. Esaki suheto na evaluacion exclusivo di **Bon Dia Aruba**.

OPINION



Skirbi pa Amy K.

Alerta pa mayornan: Proteha bo yiu ora ta usa internet

Mi kier haci un yamado na tur mayor cu tin yiu abao di 18 aña, pa semper monitor bo yiu su actividad si e tin acceso na internet, of miho, no duna bo yiu abao 18 aña acceso na internet.

E motibo cu mi ta alerta e mayornan na Aruba ta paso na Merca tin un online grupo (culto) inmoral cu yama 764. E grupo 764 ta puro maldad. <https://nypost.com/2026/02/17/us-news/house-oversight-panel-opens-probe-of-764-internet-sex-ortion-cult-that-preys-on-minors/>

E miembronan di 764 ta usa plataformanan online; Roblox, Minecraft, Snapchat, Instagram, Telegram, pa papia cu mucha y hoben online y saca informacion; number y fam, edad, adres, number di contacto, number di scol, number di resto di famia etc.



di e mucha/hoben. E miembro di 764 ta convence e mucha/hoben pa haci actonan

inmoral; comparti potret inapropia, haci daño na curpa, haci daño na bestia, mata

otro mucha/hoben, suicidio etc. y ta pidi e mucha/hoben pa comparti tur esey cu otro

miembronan di grupo 764.

Si e mucha/hoben no kier haci loke e miembro di grupo 764 ta pidi, e mucha/hoben ta ser menasa.

Na Merca den aña 2025 un hoben di 16 aña yama Penelope Sokolowski a comete suicidio despues di tin contacto online regularmente cu miembronan di grupo 764. <https://www.the-sun.com/news/15901008/teen-daughter-roblox-predator-carve-name-chest/>

Mayornan please, sea alerta na e comportacion di bo yiu y semper monitor su actividad ariba internet. Of miho, no dun'e acceso na internet si e ta bao di 18 aña.

Sea consciente di e temponan cu nos ta bibando aden.

José Miguel S. Donata

Ortografia di Papiamento di Aruba

Diabierna ultimo, 20 di februari, mi a asisti na un charla di Sr. Ramon Todd Dandaré titula "Ortografia di Papiamento: causa y consecuencia" na Biblioteca Nacional, caminda na final a bin un ponencia padilanti tocante un ortografia unifica pa Papiamento pa e islanan ABC.

Como docente di Spaño cu conocimiento amplio y dominio di Portuges y como investigado independiente, mi tin cu admiti cu ta logico, practico y benefico pa un idioma tin un ortografia. Pero den nos caso particular di e islanan ABC, Aruba tin su propio ortografia desde 1976 y e islanan Boneiro y Corsou tambe tin di nan. E ta un caso poco comun pa un idioma tin dos ortografia, y mas ainda un idioma asina chikito manera Papiamento.

Con cu nos bir'e, na fabor of contra, e escenario di dos ortografia pa e islanan ABC ta e resultado di decisionnan tuma den pasado. Cada un tin su proceso historico cu a

yega na loke nos tin actualmente. E mesun legitimidad linguistico cu e ortografia etimologico di Aruba tin, e mesun legitimidad linguistico e ortografia fonologico di Boneiro y Corsou tambe tin.

Como yiu di e isla aki y papiado nativo di Papiamento (herencia di mi grandinan), mi tin cu señala cu ta danki na Sr. Josy Mansur d.f.m., pa decanan, generacionnan di Arubiano a siña bira mas consciente y orguyoso di e idioma Papiamento y di e ortografia uza na Aruba.

Pa yega na e unificacion di un ortografia pa tur tres isla, lo dura decanan y talbes cu resultadonan minimo si mi tuma e caso di e ortografia di Portuges pa Brasil y Portugal. E proceso lo existi hopi energia (hende pa hacie), tempo y placa, paso no ta algo cu lo bay un dos tres.

Mirando nos limitacionnan como isla encuanto e tres requisitonan menciona, mi ta puntra mi mes si no ta miho pa dedica e poco recursonan

cu nos tin di energia, tempo y placa pa focus mas riba drechamento di e status di Papiamento den enseñansa. Ademá di esaki, nos por canalisa, stimula y consolida e (bon) uzo di Papiamento den nos comunidad di un forma masivo y consistente. Nos por cuminsa cu tur e actonan den enseñansa na tur nivel, sigui pa tur e profesionalnan cu ta haci uzo di e idioma diariamente. Asina nos por brinda e oportunidad na esnan interesa pa haya acceso mas facil y practico pa logra esaki.

Di e forma aki lo por crea tambe un conscientisacion mas grandi y logra un aprecio y baloracion solido pa nos idioma Papiamento, cu ta e patrimonio cultural inmaterial mas grandi di Aruba y cu nos ta comparti cada dia como habitantenan di e isla aki. Esaki ta mas relevante ainda si nos mira e mundo globalisa y digitalisa cu nos ta bibando aden awendia cu ta trece su retonan pa idiomanan chikito manera Papiamento.

Nos no mester perde for di



bista cu Papiamento ta e idioma cu ta carga e cultura y e folklore di Aruba. E ta e idioma cu nos por identifica nos mes cu Aruba, sin importa di unda nos a bin.

Pa finalisa, mi ta tribi di bisa cu e ortografia di Papiamento di Aruba nos no por consider'e un simpel elemento tecnico

cu lo por cambia of reemplasa sin mas, paso el a yega na e nivel di realisacion simbolico di identidad cu tin un tradicion pa cua ya tin un afecto y sentimento di pertenencia. E ta e representacion grafico (visual) di e manera con nos ta skirbi na Papiamento na Aruba.

Ceremonia Solemne na Plaza 18 di Maart

Gobierno di Aruba, Ministerio di Cultura y e Comision Celebracion Di-anan Nacional (CCDN) ta invita henter pueblo di Aruba pa un ceremonia solemne na Monumento 18 di Maart, unda lo rindi honor na e 2147 firman-tenan cu a sostene e lucha pa nos Status Aparte.

Fundacion 18 di maart di su banda tambe ta recorda, cu e fecha 18 di Maart como nos Dia Nacional no a wordo scogi sin mas. E tin un historia profundo su tras, un historia di deseo sincero di un pueblo humilde pero determina, combina cu un lucha ferviente cu a dura decadan-an largo y cu finalmente a culmina dia 1 di Januari 1986



cu realisacion di nos Status Aparte. Den palabranan historico di Betico Croes den eilandsraad: "18 di Maart a wordo scogi pa motibo di e fecha 18 di maart 1948, un dia riba Aruba unda tur conciudadano por uni cu un sentimento comun, caminda a expresa cu porfin nos por canta nos Himno Nacional oficial y porfin hisa nos bandera oficial di Aruba." A toca honor na e nieto di nos prome luchador pa separacion, e pionero den politica

Arubiano, difunto Henny Eman sr., esta Henny Eman jr. pa habri aña nobo como e prome Minister Presidente di pais Aruba. Un deseo a wordo cumpli. Exactamente dies aña despues, riba 18 di Maart 1986, Aruba a celebra e realisacion di e soño di tres generacion di Arubiano, cu Henny Eman como e prome Minister Presidente di pais Aruba. Riba e fecha historico aki nos ta honra:

- E politiconan cu a hiba e lucha pa Status Aparte
- E 2147 firman-tenan cu a sostene e mocion presenta na Conferencia di Mesa Rondo riba 18 di Maart 1948 door di Shon A. Eman
- Y e 95 firman-tenan di e peticion di 30 di Juli 1947

Lamentablemente Betico

Croes ta fayece dia 26 di november 1986 sin nunca reco-bra conocemento, despues di un accidente grave riba bispo di aña 1985. Historia no ta algo cu nos por cambia; e ta un fundeshi esencial di nos identidad como pueblo. E lucha pa Status Aparte a cuminsa ya na inicio di siglo pasa cu Henny Eman Sr. na timon, y e firman-tenan ta prueba di e compromiso y determinacion di pueblo Arubiano. Gobierno di Aruba, Ministerio di Cultura y CCDN ta invita pueblo di Aruba pa ta presente na e ceremonia solemne aki dia 16 di Maart proximo, for di 5:00 te 7:00 di atardi na Plaza 18 di Maart. Laga nos reuni, recorda y honra esnan cu a traha pa e libertad y autonomia cu nos disfruta awe.

Resultado Sorteo 23 februari 2026			
Cadena Alexander Lottery ta presenta resultado di weganan di suerte			
DIARIO	KORSOU	SUPER4	FLAMINGO
9418	7005	5367	3285
6673	3826	SUPER5	2323
6815	0766	-	4095

MERDIA	ANOCHI														
 Sorteo # 4846 7733 4934 0134  X2  Sorteo # 4846 1419  X2  Sorteo # 2902 8955  Sorteo # 4846 5042 Scorpio  Sorteo # 1720 066  X2	 Sorteo # 8783 5355 1119 7873  X2  Sorteo # 7827 9044  X2  Sorteo # 2532 2921  Sorteo # 6586 7044 Sagitario  Sorteo # 1516 035  X2	 Sorteo # 0 x Jackpot 0 x Match 4+ 0 x Match 4 0 x Afl. 12,00  Sorteo # 7105 0 x Jackpot 5 x Match 4 137 x Afl 8,00	<table><tr><td>Joker</td><td>Letter</td></tr><tr><td colspan="2">Proximo Jackpot</td></tr><tr><td colspan="2">200.000,-</td></tr></table> <table><tr><td colspan="2">17-19-26-29-30</td></tr><tr><td colspan="2">Proximo Jackpot</td></tr><tr><td colspan="2">54.000,-</td></tr></table>	Joker	Letter	Proximo Jackpot		200.000,-		17-19-26-29-30		Proximo Jackpot		54.000,-	
Joker	Letter														
Proximo Jackpot															
200.000,-															
17-19-26-29-30															
Proximo Jackpot															
54.000,-															
 Sorteo # 0 x Jackpot 0 x match 4 0 x Afl. 500,00 0 x Afl 50,00 0 x Afl.15,00   Sorteo #	<table><tr><td colspan="2">Mega Ball</td></tr><tr><td colspan="2">Proximo Jackpot</td></tr><tr><td colspan="2">260.000,-</td></tr></table> <table><tr><td colspan="2">Afl. 360.000,-</td></tr></table> <table><tr><td colspan="2">Sorteo #</td></tr><tr><td colspan="2"></td></tr></table>	Mega Ball		Proximo Jackpot		260.000,-		Afl. 360.000,-		Sorteo #					
Mega Ball															
Proximo Jackpot															
260.000,-															
Afl. 360.000,-															
Sorteo #															
															

Un detencion y un boto yena cu droga confisca



Dialuna mainta pasa di 8’or central di polis ta notifica personal di UGC(Departamento di Crimen Organisa)di un boto cu lo a yega canto na un boca pariba di Boca Mahos.

Mesora central ta manda patruya di polis di Sta Cruz pa bay na e sitio menciona. Polis na caminda pa e asistencia ta topa cu un persona masculino canando banda di caminda y ta full muha. Polis ta para di biaha y ta atende cu e homber y ta resulta cu e tabata abordo di e boto cu a yega canto un rato pasa. Ta trata aki di un homber nacionalidad Colombiano y e la wordo deteni bao sospecho di leynan vigente di droga. Polis cu a presenta na e sitio en cuestion a topa cu un cantidad di droga entre otro den e boto y scondi na tera. E boto y bultonan di droga a keda confisca. Cu ayudo di Kustwacht a move e boto pa

asina sigui cu e investigacion. Na e sitio tanto polis di Sta Cruz, K-9 Unit y otro departamentonan concerni a yega pa duna un man. Investigacion ta andando y no ta descarta cu lo tin mas detencion. Cuerpo Policial ta haci un apelacion pa esnan cu a wak algo of sa algo pa yama e tiplijn di polis cu ta 11141. Bo ta keda anonimo.





Dokter na warda

Oranjestad San Nicolas
Hospital Imsan
7:00 pm / 10:00 pm **24 ora**

Botica na warda

Oranjestad: San Nicolas:
Eagle : Centro Medico:
Tel. 587 9011 Tel. 584 5794

EMERGENCIA 911

POLIS

Oranjestad	100
San Nicolas	104
Santa Cruz	105
Noord	107
Tip Line	11141
Brandweer	115
Ambulance	911
Hospital	527-4000
Imsan	524-8833
Warda Costa	913
Seguridad Nacional	11911
Cruz Cora	582-2219

BOTICA

Aloe	584-4606
4 Centro Medico	584-5794
Central	585-1965
Dakota	588-7364
Del Pueblo	582-1253
Eagle	587-9011
Kibrahacha	583-4908
Maria	585-8145
Di Servicio Noord	586-4606
Oduber	582-1780
Paradera	588-6638
San Lucas	584-5119
Santa Anna	586-8181
Santa Cruz	585-8028
Sero Preto	584-4833
Trupial	583-8560

UTILIDAD

Setar	117
Web	525-4600
Elmar	523-7147

FUNERARIA

Aurora	588-6699
Royal Funeral H.	586-4444
Ad Patres	584-2299
Olive Tree	584-8888

Aruba Transfer Tour & Taxi C.A.
Tel: 582 2116 / 582 2010

Taxi Adres Services (24h)
Tel. 587 5900

A1 Taxi Services Aruba
Tel: 587-8850
Tel: 280-2828
Whatsapp: 592-7024

Cas Di Cultura

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

Fundacion Contra
Violencia Relacional
Tel: 583-5400

Fundacion Autismo Aruba

Irenestraat 21 Aruba
297-588-1179

Fundacion Pa Nos Muchanan

Cumana 2 Aruba
297-583-4247

Fundacion Tel Pa Hubentud

Wilhelminastraat 19 Aruba
297-588-6138

Koningin Wilhelmina Fonds

Spinozastraat 9 Aruba
297-582-0412

Mary Joan Foundation
Sabana Blanco 8 Aruba
297-588-9999

Rode Kruis Aruba

Pedro Gallegostraat 14
Tel. 297-582-2219
Fax 588-3376

Famia Planea (SBVO)

Avenida Milio J Croes 17 B Aruba
297-588-9591
www.famiplanea.org
famiplanea@hotmail.com

Stichting Fundacion Guia Mi

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord (close to the hotels)
Tel: 736-2952 or 593-7081

Corte na Spaña ta anula huicio cu hurado pa prome minister su casa *Pero e investigacion ta sigui*



(AFP) - Corte na Madrid a anula e decision di un hues di duna orden pa prome minister Pedro Sanchez su casa, Begona Gomez, bay huicio cu hurado tocante supuesto labamento di fondo publico, yamando esaki "prematureo."

El a agrega, sinembargo, cu e investigacion ta andando.

E investigacion, cu tin hopi tempo ta cana, ta un di e varios investigacion contra e famia Sanchez y aliadonan cercano cu a causa berguensa na e lider Socialista y a pone un cantidad di presion riba e coalicion di minoria. "E decision tuma pa e magistrado di investigacion ta prematuro y tin falta di base legal, basa riba hecho y den procedura,"

e corte a bisa den un decision tuma dia 20 di februari, cu a haci publico dialuna.

Hues Juan Carlos Peinado a habri un investigacion den april di 2024 pa determina si Gomez a explota su posicion como casa di Sanchez pa beneficio priva. Den september di 2025, el a duna orden pa Gomez para huicio dilanti un hurado bao cargo di labamento di placa conecta na e contratacion di un asistent cu tambe ta bao investigacion.

Su abogado a apela e decision, denunciando un falta di evidencia y cuestionando e hues su interpretacion di e codigo penal.

Gomez consistentemente a

rechasa cu el a comete cualkier eror.

Sanchez a rechasa e acusacionnan contra su casa como un intento di debilita su gobierno, cual a exigi su renuncia.

Investigacionnan separa di corrupcion a rondona e dos figura pisa Socalista, Santos Cerdan y ex minister di Transport Jose Luis Abalos, ademas di prome minister su ruman homber mas chikito David Sanchez.

E problemanan legal aki ta empeora problemanan pa e gobierno den minoria cu ta participa den negociacionnan di labor cu un gran cantidad di partido purbando di pasa nan legislacion.

Pronostico di tempo

Tempo:

Awe tardi y awe nochi: parcialmente nubla y generalmente seco
Den marduga y mañan: parcialmente nubla cu un awasero breve

Temperatura maximo 32 grado celsius
Temperatura minimo 25 grado celsius
Indice di calor (heat index) den y rond di oranan di merdia: 33 pa 37 grado celsius
UV index: 10

Bahada di solo : 6:48 pm
Subida di solo : 6:58 am

Biento:

Moderata te basta fuerte for di direccionnan generalmente oost; Forsa 4 te 5 (20 te 39 km/ora, 11 te 21 nudo).
Durante di dia fuerte te posiblemente duro den rafaga; forsa 6 te 7 (40 te 61 km/ora, 22 te 33 nudo).

Situacion general di tempo pa proximo 24 ora:

No ta spera cambianan grandi den e weer durante e periodo di pronostico aki. Nivelnan di humedad den atmosfera ta limita y lo stroba desaroyo di nubianan cu por produci awasero. Pa e motibo aki no ta spera awasero di importancia y weer seco lo domina.

Un concentracion moderata te halto di stof di Sahara lo drenta atmosfera regional den curso di mañan dialuna. Esaki lo stroba e visibilidad y trece aire di calidad abou pa region local. Personanan cu tin sensibilidad pa cambianan den calidad di aire mester tene esaki na cuenta.

Condicionnan maritimo/estado di lama:
Na partinan protegi di costa: Keto cu olanan rond di 1 pia.



Na partinan zuid protegi: tranquil, 1 te 2 pia.

Na partinan zuid no protegi: tranquil te modera cu olanan di 2 te localmente 3 pia.
Na partinan oost te noordwest di costa: Generalmente modera cu olanan alrededor di 4 pa 6 pia.

Aviso/alerta:

Operadornan di boto chikito mester bay cu cautela na partinan oost te noordwest di cost

OLIVE TREE FUNERAL CARE & CREMATORY

Lagrima y Flornan lo seca pero su amor duna na nos y tur su recuerdonan y tur locual cu e la haci y significa pa nos lo keda graba pa semper den nos memoria y curason.
Salmo: 62:1

Cu dolor na nos curason, pero conforme cu boluntad di Dios y ta agradecido pa tur locualela significa pa nos, ta anuncia fayecimento di nos Mama y Wela stima:

**Sra. Johanita
(Chichi) Franken
– Kwidama
*24 november
1946
- † 14 februari
2026**



Na number di su:
Esposo: † Thomas Kwidama

Tata: † Tony Thiel

Mama: † Catharina Franken

Yiunan:
†Ana Maria Franken y Vladimir Arcondoña
Juan Franken & † Adela Croes – Franken
Danilo Vrolijk y Famia
Nicolaas Franken y Mirna
Francis Leo Kwidama
Nieto y nietanan:
Gerald Franken y famia
† Fricherald Arcondoña
Mandy Robert

Bisa – nieta: Avalana Franken
Omonan: † Felipe Franken & † Pangracia Maduro y famia
† Pedro Franken & † Maria Chirino y famia

Mescos cu yiunan: Judella Franken y famia
Maikito Franken y famia
†Gregory Franken y yiunan
Shamarc Franken y yiunan
Jessica Kock y famia
Joraldine Kock y famia
Joyce Kock y famia
Jerwin Kock y famia

Manera un subrino: Riley St. Jago
Amiga di cas: Emerita Winterdaal
Primo- y primanan, rumannan di Iglesia, bisiña- y conosirnan y demas famia: Franken, Thiel, Vrolijk, Kwidama, Arcondoña, Robert, Maduro, Chirino, Kock, St. Jago, Tromp, de Cuba, Winterdaal, Croes.
Nos disculpa si den nos tristeza nos por a lubida algun famia of conosir.
Acto di entierro lo tuma lugar: Diamars, 24 februari 2026
Orario: 2 pm – 4pm Lugar: Olive Tree Funeral Care & Crematory - Piedra Plat
Despues lo sali pa Santana Sabana Basora.

Despues di entierro nos no lo ricibi bishita na cas.

Aurora Royal Pray Funeral Home & Crematory

Mi dios, mi señor, mi salvador.
Cu bo amor infinito tene mi den bo braza.
Ya no tin scuridad

Cu dolor na curazon nos ta participa fayecimento di nos ser stima.

**Sra: Angelie Anita
Everon
Cariñosamente yama
“Anchi”
*01-25-1966 - †02-18-
2026**



Mayornan:
†Jan Maduro y † Magda Everon
Na number di su:
Yiunan:
Zhilayne Loeftok
Zhaylee Loeftok
Yiu di criansa:
Helen Loeftok y Ryan v/d Linde
Manera nieta:
Elaine Moreno
Nayla Moreno
Tata di yiunan y ex casa cu a yude te final:
Fidel (Robbie) Loeftok
Ruman:
†Mirna Maduro y famia
Jani y Maita Maduro-de Cuba y Famia
Imelda y Theo Zievinger- Maduro y Famia
Diana y Isaías (Chai) Hernandez-Maduro y Famia
Ivan y Mayra Angela- Henriquez y Famia
John Angelay Nataly Arends y Famia
Nancy Angela
Glenn y Jessica Maduro-Irausquin y famia
Patrick y Zulema Maduro-Frans y famia
Ester Maduro y Marc Kranwinkel y famia
Jasmin y Bas Olde Riekerink- Maduro y Famia
Tanta y omonan:
†Emeraldo Everon y Cecilia Everon y famia
†Julio Everon
†Valentino (Baty) Everon y Maria simileer y famia
†Reginaldo (Nady) y Corrie Driessen y famia
†Damasco (Danchi) y †Lidia Everon y famia
Maria Dora Everon
†Many Everon
†Dino Everon
†Mario Everon y Miriam Everon y famia
†Lucia Everon y famia
Ex cuñanan y suanan:
†Simon Pablo Loeftok
Edwina Loeftok y famia
Shirly Loeftok y famia
Richard Loeftok
Nixon Loeftok, esposa Edna y famia
Maline Loeftok esposo Hugo y famia
Anthony Loeftok y famia
Marjory Loeftok y famia
Hubert Loeftok y famia
Manc ruman:
Vivian v/d werf
Omaira Web
Ivan Everon
Madrina:
Carla Koolman Dirks
†Carmen Paskal
Mihor amigonan y como ruman:
Esther Kock
Swinda Dirks
Maria Danje
Esmeralda Brete
Ada Gomez Croes
Dalila Dabian
Edna Mariana
Francisca Young Landvruegd
Primonan y primanan
Ihanan:
Ryan Everon
Marvick Everon
Khareenzah v/d Werf
Jayzon Everon
Amigonan di cas:
Robbie Brete y Famia
Jean Anice y famia
Henry Hernandez y Famia

Ex Coleganan/ Amigo/a nan di Setar, Imsan, Zorg transport
Demas famia y Amigonan: Everon, Loeftok, Dirks, Maduro, Heronimo, Koolman , Vrolijk, Webb, Driessen, Henricus, Hernandez, Zievinger, Angela , Henriquez, Tromp , Eman ,Croes, Marciano, Rodriguez, Niles, Dabian, Labad , Vis, hoevertsz, Werleman, Rasmijn, Erasmus, Ras, Franken , De Cuba, Boekhoudt, Salazar, Kock, Van der linden , Growell, Geerman, Albertus, Niles, Kelly, Trimon, Bislik, Toppenberg, Dorotaal, Moreno, Dubero, Gerardo, Landvruegd, Quand , Petrocchi, Peña, Dijkhof, v/d Biezen, Lacle, Winterfal, Loeftok, Orman, Salamatina, Irausquin, Bareño, Lopes, Jansen, Zimmerman, Vingal, Brito, Wolff, Rozenberg, Croeze, Bermudes, Garcia, Schwengle, Harms, Jacobs, Bikker, Orman, lopez, Richardson, Flannegin
Despensa nos si den nos tristeza nos por a lubida algún famia of conoer.
Condolencia lo tuma lugar na Aurora Funeral Home Diamars 24 februari 2026 di 7or- 9or di anochi.
Entierro lo tuma lugar na Misa Inmaculada Concepcion na Sta Cruz Diaranson 25 Februari 2026 di 2or pa 4 or di atardi. Despues lo sali pa Santana Catolico na Sta Cruz.

Deseo di defunto: Please no bisti color di rouw, bin cu color cla y alegre. Ban corda e defunto den momento bunita y feliz.
Despues di entierro no ta recibí condolencia na cas.

Aurora Royal Pray Funeral Home & Crematory

23456Met groot verdriet maken we het overlijden bekend van:



**Joannes M.M. Samuels
“Joost”
*17-07-1958 - †21-02-2026**

Plaats en tijdstip van het afscheid wordt later bekend gemaakt.

Aurora Royal Pray Funeral Home & Crematory

“Señor ta mi wardador, mi’n tin falta di nada

Den cunucu di yerba berde e ta ponemi sosega.

E ta hibami na awa trankil,
Pa mi bolbe haña forsa”.
Salmo: 23

Nos ta anuncia fayecimento di:



**Luciana Dossous
*04-06-1961 - †19-02-2026**

Acto di entierro lo wordo anuncia despues.

Corte Supremo di Merca lo tende oferta pa blokia demandanan di cambio climatico

(AFP)—Corte Supremo di Merca a acorda dialuna pa tende un caso treci dilanti pa companianan di azeta y gas buscando pa blokia demandanan di cambio climatico. Decenas de demanda a ser entrega na Merca buscando pa tene productornan di combustible fossiel responsable pa dañonan causa pa cambio di clima.

Exxon Mobile y Suncor Energy (USA) ta apelando un huicio di Corte Supremo na Colorado cu un demanda di cambio climatico entrega pa e ciudad y condado di Boulder, Colorado, mester ser permiti pa haya procedemento den corte estatal.

E gigantenan di energia ta argumenta cu declaracionnan asina mester haya audiencia den corte federal y no estatal, y cu leynan di ambiente federal mester aplica. “Boulder, Colorado, no por haci politica di energia pa henter e pais,” nan a bisa den nan petition puntrando e Corte Supremo pa reevaluacion.

“Ley estatal no por impone e costonan di cambio climati-

co global riba un parti di e productornan di energia global scogi pa un solo municipalidad.”

Exxon Mobil y Suncor a bisa cu companianan di energia ta ser demanda pa “biyones di dollar den daño pa heridanan supuestamente causa pa e contribucion di emisionnan di gas di efecto invernadero na cambio climatico global.”

“Pero manera e Corte a reconoci pa mas cu un siglo,” nan a bisa, “e estructura di nos sistema constitucional no ta permiti un estado provee alivio bao ley estatal pa heridanan supuestamente causa pa contaminacion emitiendo pafu di e estado.”

E departamento di husticia bao presidente Donald Trump, anulando e posicion di e administracion di Biden, a puntra e mayoria conservativo den Corte Supremo pa duna evaluacion den un informe den e caso na Colorado.

“Reaccionando na e decision pa tende e caso, Alyssa Johl, vice-residente na e Centro pa Integridad Climatico, a urgi



Corte Supremo pa mantene e huicio di Corte Supremo na Colorado. “Ningun parti di e Constitucion, of cualkier estado of ley federal, ta duna corporacionnan e derecho pa gaña publico tocante e peligronan asocia cu nan produccionnan simplemente pasobra e productonan ey ta combustible fossiel,” Johl a bisa den un declaracion.

“Corte mester mantene loke e Corte Supremo di Colorado y otronan a haci hopi cla: comunidannan manera Boulder tin e derecho di busca responsabilidad den nan corte estatal ora corporacionnan causa daño na localnan.”

Hopi di e demandanan entrega contra gigantenan di petroleo y gas y autoridad-

nan local ta modela riba accionnan legal exitoso tuma contra e industria di tabaco den añanan 1990.

Ningun a bay huicio ainda.

Ta anticipa cu e Corte Supremo lo tende argumentonan den e caso durante e termino di otoño, cual ta cuminsa na october.

Iran lo reacciona “ferozmente” na cualkier atake di Merca, advirtiendone conflicto regional

(AFP)—Iran a priminti dialuna pa tuma represalia “ferozmente” contra cualkier atake di Merca y a reitera advertencianan di un conflagracion regional den respuesta na e menasa di Donald Trump tocante atakenan limita.

E retorica di Tehran y Washington ta bin mientras ambos banda tabata programa pa tene discusionnan indirecto na Ginebra tocante un posible acuerdo relaciona cu e programa nuclear controversial di Iran, cu un oficial Mericano confirmando cu discusionnan lo resumi diahuebs sin ofrece mas detaye.

Mientras Iran ta enfrenta presion di Merca sosteni pa un forsa militar den Medio Oriente, studiantenan di universidad a cuminsa e semester nobo cu protestanan anti-gobierno, rebibando slogannan di manifestacionnan nacional cu a peak na januari



y a enfrenta un abordamento mortal di gobierno.

Trump a bisa siman pasa cu e ta considerando un atake limita si Iran lo yega na un acuerdo, pero e minister di Asunto Exterior na Tehran a reitera dialuna cu cualkier atake, hasta si ta limita, “lo ser

considera como un acto di agresion.”

“Cualkier estado lo reacciona na un acto di agresion... ferozmente, pues esey nos lo haci,” vocero di e ministerio Esmail Baqaei a bisa.

Iran a bisa cu e lo ta cla pa

entrega un propuesta pa un acuerdo riba su programa nuclear pa mediador den e proximo dianan, cu Trump bisando diahuebs cu Tehran tabatin un maximo di 15 dia pa yega na un acuerdo.

Iran ta insisti cu su programa nuclear ta pa uso civil, pero e Occidente ta kere cu e ta diseña pa construi bomnan atomico. Mientras cu Iran a tuma cualkier cos menos e asunto nuclear for di mesa, Washington kier discuti e misilnan di Tehran tambe y su sosten pa gruponan militante den e region.

E dos pais a conclui un segundo ronda di discusionnan indirecto na Suisa siman pasa bao mediacion di Omani.

E minister suplente di Asunto Exterior Kazem Gharibabadi a bisa cu resumen di discusionnan diahuebs tabata “un bentana di oportunidad nobo,” pero a adverti di e

riesgo di un conflicto regional si su pais ser ataca.

“E consecuencianan di cualkier agresion renoba no lo keda na un pais y responsabilidad lo keda cu esnan cu ta inicia of ta sostene accionnan asina,” Gharibabadi a bisa, haciendo yamado na otro paisnan pa “tuma stapnan significante pa preveni mas escalacion.”

E riesgo di conflicto a causa miedo den Iran y a pon’e otro paisnan tuma medidanan di precaucion. Dialuna India a uni cu Suisa, Serbia, Polonia y Australia pa haci yamado na su ciudadanonan pa sali di Iran.

Merca, mientras tanto, a duna orden na personal no-emergente pa sali di su embahada na Libanon, cas di e grupo militante Shiite Hezbollah, cual tin relacion cerca cu gobierno di Iran.

Merca a cuminsa cu retiro for di su base militar mas grandi na Siria despues di 12 año

(Infobae) - E proceso ta spera di ta completa den 20 te 30 dia, haciendo Rmelan e ultimo enclave bao di control Mericano y estableciendo un equilibrio politico nobo den e region.

Forsanan militar di Merca a cuminsa cu retiro for di nan base mas grandi noordoost di Siria dialuna, marcando e retiro final despues di mas cu un decada di presencia militar. Segun fuente di seguridad y testigonan, decenas di truck, algun di nan cargando vehiculo arma, a sali for di base Qasrak na provincia Hasakah, dirigiendo nan mes pa frontera di Irak mainta riba 23 di februari. Imagennan publica pa Reuters a mostra e grupo cerca di Qamishli. Comando Central di Merca (Centcom) no a emiti ningun comunicacion oficial riba e operacion.

Ceramento di Qasrak ta laga e coalicion internacional lidera pa Merca cu solamente un in-



stalacion militar riba territorio Sirio, localisa na Rmelan, cerca di frontera cu Irak. Desde 2014, Qasrak tabata un ubicacion clave den operacionnan contra Estado Islamico, unda Forsanan Mericano tabata desplega den coordinacion cu Forsanan Democratico Sirio (SDF), un coalicion lidera pa e milicia Kurdo. Ni Ministerio di Defensa Sirio ni SDF no a responde na peticionnan pa comentario riba e proceso. Segun fuente diplomatico y gubernamental Sirio cita pa AFP, retiro completo for di

Qasrak y otro basenan Mericano mester ser completa den 20 te 30 dia, despues di cual ningun soldad Mericano lo keda na Siria. Un funcionario halto gubernamental Sirio a afirma cu den un luna "no lo tin mas presencia militar na e basenan," mientras un fuente Kurdo a confirma cu e retiro ta conforme cu acuerdonan bilateral reciente.

E retiro Mericano ta coincide cu consolidacion di control pa e gobierno interino na Damascus den norte y noor-

doost di Siria, regionnan cu te awor tabata bao encargo di e administracion Kurdo y proteccion di Washington.

Segun condicionnan di e acuerdo firma riba 29 di januari 2026, Forsanan Kurdo a acepta integracion den Armada Nacional Sirio, permitiendo despliegue di Forsanan estatal den ciudadnan manera Hasakah y Qamishli, y eliminando e necesidad pa un zona protegi internacionalmente. E acuerdo ta inclui garantia riba derechonan educativo y cultural pa poblacion Kurdo, poniendo fin na decenas di conflicto riba autonomia.

Presencia di Merca na Siria a cuminsa na september 2014 como parti di Operation Inherent Resolve, un coalicion di mas cu 80 pais contra Estado Islamico, cu e tempo ey tabata controla teritorionan den e region. E ultimo bastion yihadista, Baghouz, a cay na maart 2019, pero Washington a mantene mas o menos 1.000 soldad den e pais

pa preveni resurgimento extremista y contene influencia Irani.

Contexto politico a cambia profundamente despues di e caida di e regimen di Bashar al-Assad na december 2014, ora e presidente a huy pa Moscu y un gobierno transicional a ser estableci na Damascus. Desde e tempo ey, e administracion nobo a inicia un apertura diplomatico, facilitando e acuerdo cu e Kurdonan. Den e escenario aki, presencia militar Mericano a perde su hustificacion strategico, acelerando e proceso di retiro: base Al-Tanf a ser entrega riba 12 di februari, y evacuacion di Qasrak a cuminsa e dialuna aki.

Ta calcula cu, despues di completa e retiro, Merca lo a termina 11 año y 5 luna di operacion militar continuo riba tera Sirio. Washington lo mantene solamente un capacidad minimo di coordinacion antiterorista for di territorio Iraki.

Suisa a congela mas cu 880 miyon dollar den activonan liga cu Nicolas Maduro y su asociadonan

(Infobae) - Autoridadnan Suiso a confirma cu e medida tin como obhectivo pa preveni fondonan sospechoso move y pa garantiza cu nan ta bolbe na e pueblo Venezolano si compraba cu nan a ser obteni den manera ilicito

Gobierno Suiso a congela 687 miyon di franc Suiso (mas o menos USD 880 miyon) den activonan liga cu narcodictador Venezolano Nicolas Maduro y su circulo interno, como un medida preventivo pa stop e movimiento di fondonan despues di e captura di e ex-lider Chavista riba 3 di januari.

Ministerio di Asuntonan Exterior di Suisa a informa agencia di noticia AFP cu e suma aki ta representa e total di activonan reporta pa intermediario financiero na Oficina di Informacion riba labamento di placa, despues cu e orden di congelacion a drenta na vigor riba 5 di januari.

Conseho Federal Suiso a adopta e medida despues di e aresto di Maduro na Caracas y su transferencia pa Merca,



unda e ta enfrenta acusacionnan di trafico di droga y corrupcion.

E decision ta apunta pa protege e sistema financiero Suiso y pa preveni cu placa cu ta bin for di actividadnan ilicito sali for di pais.

Segun Ministerio di Asuntonan Exterior, e congelacion ta involucra fondonan perteneciente na 21 di e 37 persona identifica den e or-

denansa Suiso riba Venezuela, aunke autoridadnan no a revela e identidad di e tene-dornan pa motibonan legal.

Legislacion cu ta sostiene e congelacion di e activonan aki ta e Ley Federal riba Congelacion y Restitucion di Activonan Ilcito den posesion di Persona Politicamente Expuesto na Exterior (FIAA). Suisa a enfatisa cu e fondonan lo keda congela te ora investigacionnan determina

su origen.

Si confirma cu nan a ser obteni di manera irregular, gobierno Suiso a sigura cu lo busca su restitucion pa beneficio di pueblo Venezolano. Dos tercer parti di e fondonan congela ya tabata bao di procedementonan criminal na Suisa prome cu aplicacion di e ordenansa specifico riba Venezuela.

E resto, mas o menos 239 mi-

yon di franc Suiso, a ser blokia for di e fecha cu e regulacion nobo a drenta na vigor.

Conseho Federal a clarifica cu e medida no ta afecta miembronan di e regime Chavista actual, encabesa pa Delcy Rodríguez, ken a asumi poder despues di e aresto di Maduro. E lista di personanan sanciona ta enfoca riba asociadonan di e dictador derota y figuranan di su administracion cu a perde influencia despues di e cambio di poder na Caracas.

Autoridadnan Suiso a enfatisa cu e cambio di gobierno na Venezuela ta posibilita revision y eventual repatriamento di activonan obteni den manera ilicito, sin cu circunstancianan legal internacional ta decisivo pa aplicacion di e FIAA.

Suisa a confirma su disponibilidad pa actua cu rigor contra intencionan di e regimen autoritario, manera esun di Venezuela, pa sconde rikesa obteni den manera ilicito, y a reafirma su compromiso na transparencia, legalidad y e lucha global contra labamento di placa.

Francia lo revoca acceso di embahador di Merca na gobierno despues cu e no a presenta

(AFP) - Francia a cuminsa tuma accion dialuna pa blokia acceso di embahador di Merca, Charles Kushner, na ministernan di gobierno, despues cu e no a presenta pa splica comentarionan tocante un activista derechista cu a asesina.

Minister di Exterior Jean-Noel Barrot a convoca Kushner despues cu e embahada na Mericano na Paris diadomingo a publica comentarionan di e administracion di Trump na Washington tocante Quentin Deranque.

Deranque, di 23 aña, a fayece a causa di heridanan na su cas despues di encuentro entre isquierdista radical y sostenedornan ultra derechista banda di un manifestacion dia 12 di februari contra un politico di LFI na Lyon.

Riba diadomingo, Barrot a



denuncia cualkier intento di explota e asesinato "cu intencionnan politico" y a convoca Kushner pa un reunion 7or den ora local dialuna.

Un fuente diplomatico a conta AFP cu e embahador, ken su yiu homber ta casa cu President Donald Trump su yiu muhe, a manda un oficial di e embahada na su luga, citando compromisonan personal. "Den bista

aparentemente no a comprende e rekisitonan basico di e mision di e embahador y e honor den representa bo pais, e minister (Barrot) a pidi pa (Kushner) no tin acceso directo cu e miembronan di gobierno Frances," e ministerio a informa.

Kushner, sinembargo, si l ota permiti sigui cu su responsabilidad diplomatico y tin "comunicacion" cu oficial-



nan, el a a agrega den su declaracion.

E administracion Mericano a denuncia violencia ultra isquierdista y a haci yamado pa esnan responsable para responsable dilanti husticia. Italia su prome minister Giorgia Meloni, tambe a duna comentario, causando un guerra di palabra cu presidente Frances Emmanuel Macron, ken a urgi su persona pa stop

di "duna comentario tocante loke ta sucede den otro paisnan."

Kushner, ken a tuma su posicion na Paris di aña pasa, ya caba a ricibi un convocacion na e ministerio di Exterior den fin di augustus, despues cu gobierno Frances a tuma excepcion na su critica cu accion contra antisemitismo.

Polis di Reino Uni ta aresta ex embahador Peter Mandelson den caso di Epstein

(AFP) - Polis di Londres a aresta ex embahador Peter Mandelson den un investigacion tocante su lasonan cu difunto financiero Mericano Jeffrey Epstein, dianan despues cu a detene ex prins Andrew.

Mandelson, un figura clave den politica Britanico y Reino Uni su ex embahador na Washington, a keda aresta bao sospecha di mal conducta mientras e tabatin un posicion publico despues cu acusacionnan as surgi. E acusacionnan aki a bini dilanti despues cu a publica e set mas reciente di documento conecta na Epstein, cual e gobierno Mericano a publica luna pasa.

"Oficialnan a aresta un homber di 72 aña bao sospecha di mal conducta mientras den un posicion publico," Polis Metropolitano a bisa den un declaracion.

Imagennan riba television di Reino Uni a muestra Mandelson, di 72 aña, hiba for di su cas na parti nort di Londres compaña pa un homber y un muhe, despues cu polis a dreña su popiedadnan anteriormente e luna aki. "El a keda aresta na un adres na Camden dialuna, dia 23 di februari, y a hib'e stacion di polis pa un entrevista," Met a agrega.

E aresto tambe a tuma luga despues cu Andrew Mountbatten-Windsor, Rey Charles III su ruman homber, a keda deteni diahuebs y laga den libertad bao investigacion den un acusacion separa de mal conducta den posicion publico, cual tambe ta relaciona cu e documen-



tonan mas recien di Epstein.

Mandelson ta investiga pa acusacionnan cu el a manda documentonan di naturalesa sensitivo pa e difunto ofensor sexual ora cu e tabata minister den gobierno, incluyendo durante e caida financiero di 2008.

Polis no a especifica cua documentonan ta parti di e investigacion.

E ex-politico veterano a keda despedi pa prome minister Keir Starmer como embahador pa Washington dep september ora cu un publicacion anterior di documento conecta na Epstein a mustra e profundidad di nan amistad.

Sinembargo Mandelson su nombracion a los un tormenta politico cu dos di Starmer su aliado top renunciando

pa motibo di esaki. Starmer a pidi dispensa na Epstein su victimanan pa e nombracion di Mandelson, y a acusa e ex embahador di a gana tocante e profundidad di su lasonan cu e financiero durante e proceso di screening pa su posicion.

Firma di ley Mishcon de Reya, representando Mandelson, a bisa anteriormente e luna aki cu e ta "lamentar, y lo lamenta te dia cu e muri, cu el a kere den Epstein su mentiranan tocante su criminalidad. Mandelson no a descubri e berdad tocante Epstein te cu despues di su morto den 2019," e declaracion a bisa. "E ta profundamente repent y disculpa cu e mucha y muhenan vulnerable y sin poder no a ricibi e proteccion cu nan tabata merece."

Gobierno lo publica miles di email,

mensahe y documento na Mandelson su procedura di veto, cual por aumenta presion riba e prome minister y otro ministernan.

Minister di gobierno Darren Jones, riba dialuna a bisa cu e prome set di documento relaciona cu Mandelson su nombracion lo keda publica den comienso di maart.

Starmer a lucha contra yamadonan pa renuncia anteriormente e luna aki despues cu el a admiti cu e tabata sa tocante Mandelson su amistad andando cu Epstein - cual aparentemente a sigui despues cu a condena e financiero di prostitucion di mucha den 2008.

Mandelson, un ex comisario di Union Europeo, a baha for di parlamento su parti superior, House of Lords, anteriormente e luna aki.

E firma di consejo di cual e ta co-fundador, Global Counsel, tambe a yega bancarota siman pasa ora el a stop di participa den mercado y a designa administracion den un intento di salba algun di su bienes. Varios cliente grandi, incluyendo Barclays, Tesco y Premier League, a corta nan laso cu e firma den simannan reciente, segun reportahenan den prensa.

Oficialnan di Met su ekipo di specialistanan den crimen a keda desplega anteriormente e luna aki pa haci un entrada hudicial na 2 di su adres, un na English County of Wiltshire y e otro na Londres, segun polis.